

清容居士集 附札記

四



貴州省圖書館  
中文舊書



清容居士集

附札記

(四)

J  
17.8  
2056

袁掬撰

# 清容居士集卷第九

律詩

五首

次韻善之雜興七首

習隱漸成癖。苔光綠映扉。避名常好好。絕俗任非非。日落長鑱柄。天寒白苧衣。南鵬五月息。戢翼笑羣飛。  
萬事不滿笑。書林盡歲娛。未須夸得意。底用哭窮途。細雨看移竹。秋風學餉鱸。百年真急景。醉入壁間壺。  
昔日登臨地。狂歌祇自求。漢宮空有恨。吳女不知愁。雲葉寒沙霽。江花古岸秋。何人持鐵板。敲徹舊邊樓。  
學道常無寐。披衣聽曉笳。精勤慕柏大。詭幻笑藥巴。丹熟抽金汞。窗明鍊玉沙。微陽端有候。一點應吹葭。  
善之近學參同契。故戲及之。

臥遊元不惡。佳處絕榮枯。雲憶東西寺。山看大小孤。行年須白社。失意付黃墟。何事遼東鶴。空悲景物殊。  
鄧子清如竹。蕭蕭澹世情。下帷鄰草色。倚杖愛松聲。嗜癖成書買。身窮付筆耕。乘槎空有約。何日海邊城。  
書聲連古巷。疑是白雲廬。吟苦眠料理。塵深靜破除。詞華輕大曆。風雅近黃初。願我相知舊。艱難愧不如。

月黑

月黑斗杓轉。昏昏古柳墟。干振寒戍響。窰堵亂烏號。風定歸潮急。門深落葉高。向來江上意。無語獨蕭騷。

次韻題林隱

移家鄰縣去。住久不知年。花擁檐前樹。泉歸澗下田。丹芽承露浴。石乳拾松煎。擬欲題新竹。才疎愧惠連。

次韻上官伯圭夜坐觀梅二首

愛酒嫌劇飲。天寒但欲眠。烏啼千樹外。雁過一燈前。霜角悲涼調。風幡自在禪。平生江海意。袖手送殘年。江梅元楚楚。冰雪總相宜。肯佐金樽舞。寧辭玉笛吹。天心元自正。地脈本無私。不盡關山意。巡檐與賦詩。

題柯自牧救荒記

曾聞於越地。千里草青青。比屋呼庚癸。連年厄丙丁。已傳青社記。不用峴山銘。近說天台宅。新成太祝廳。

壽高舜元父二首

喜見黃鐘月。重推絳縣年。雪窗溫鼎火。春甕養壺天。朝市成真隱。階庭擁壽仙。時吟五字律。獨立晚風前。玩易喜心清。年高見太平。杖扶靈壽穩。松削養和輕。夜月前朝事。春風九老盟。初筵慙後至。立雪捧深觥。

打灘

老石太古色。避魚新水姿。輕冰養流汞。急瀑散飛碁。角力誰爲挽。臨流亦自移。南來多此意。北望莫相疑。

春陰

寂寂春陰半。南來未識花。故鄉憶寒食。細雨摘新茶。物色供詩句。風沙入鬢華。山林元未改。客路獨烏紗。

懷城南諸友二首

春至長爲客。愁多始憶君。風程江北路。水驛海東雲。杜宇深深怨。醪醑淡淡醺。行藏曾共數。不是故離羣。

養性深辭酒。全交淺作書。寧知故人厚。自愧後生疎。春入黃河道。雲分碧鳥居。江湖從浩蕩。不敢愛吾廬。

舟中雜書五首

野色連雲白。春聲引樹清。遊魚新浪急。歸鳥片帆輕。曉夢三千里。風餐第幾程。萍蓬元未穩。徙倚問天明。挂席疎星外。停舟獨柳邊。團團風始陣。帖帖月初弦。隴曲沙成雪。吳歌水拍天。行藏有如此。把卷獨悠然。春睡元無著。鄉心比酒醺。飛花空有意。小雨不成容。獨樹疑新塚。羣鴉似亂峯。艱難憐浩蕩。散髮遂初慵。河落渾無底。飄零總客塵。春洲蘆雁少。曉戶柘蠶勻。京洛饒豐稔。江湖樂賤貧。低徊吾不恨。應有故山筠。桑柘斜陽道。天然錦繡機。雲容催溽暑。花片憶春霏。水落新魚瘦。風清宿麥肥。歸程時屈指。重午試生衣。

淮浦

淮水奔如箭。舟維岸屢移。斷岡封馬鬣。落雁陣魚麗。白葦前朝界。青帘古戍基。亂離今已矣。風物漸熙熙。立春日宿大清口。舟中見新月。二鼓雪作。

春月如佳士。翩翩欲上船。相逢疑昨日。一別又新年。水鏡心胸朗。空輪體質全。更深飛雪急。直與鬪清妍。次韻陳剛中待制初秋二首

碧樹晚雲餘。秋聲入客廬。知公吟蟋蟀。勸我憶鱸魚。宦味元無著。鄉心得未疎。清塵滿雙鬢。蕭瑟不禁梳。岸幘倚書楹。寒砧徹四城。馬歸人獨語。雁過月初生。寂寂候蟲急。淒淒落葉清。客懷誰與共。搔首見參橫。

送牟元通歸瀘州

西州人物論翁季擅清門。已暗金牛路。猶傳鐵騎孫。巴江雲不盡。蜀嶺雪空存。邂逅衣冠聚。艱難得共論。  
夜夢作詩覺因足後韻

薄酒薄於水。濃山濃似春。梁間雙語燕。天外獨歸人。細柳千重緒。飛花一寸塵。碧窗初睡醒。新月寫清真。

淮陰大風

極目虛無裏。飄飄萬馬馳。飛蓬旋裏籥。虛谷應填箴。春樹元無著。晴雲復自持。倚舟沙際穩。歸雁得相隨。

題温州太守德政詩後

海郡炎歊重。涼風起素秋。飛蝗分界去。鳴鶴下陂遊。白布官租減。黃甘雅詠酬。兒童多好語。竹馬擁君留。

次韻馬伯庸春思兼簡繼學二首

落花千萬朵。一一爲君開。粟暈排金縷。酥凝爛玉杯。美人乘馬至。仙子抱琴來。莫學飛紅似。隨風喚不迴。  
行寓春匠。下榻望君來。雙玉矜嬌思。聯鑣聘逸才。題詩紅袖擁。傳詔錦袍迴。羞殺高眠者。楊花滿綠苔。

送秦巖卿從事出宰北平縣

高秋右北平。出宰樂時清。白水前朝界。黃雲舊塞城。彈琴看雁過。束帶候雞鳴。不盡平蕪際。題詩倚馬成。

黃河口

徐州城北。與黃河相衝。今從此南流。

河落流沙駛。茫茫禹甸周。昔聞傳北載。今已絕東流。俊鶴辭高下。輕鷗擅去留。百年文采盡。日落認黃樓。

徐中丞母八十

謝庭森玉樹。漢闕賜金花。懿德傳家盛。耆年舉世誇。晴萱當檻直。冬筍隔籬斜。拭目諸孫秀。翩翩佩紫綃。

送張榮澤

斂板榮陽縣。栽花接早春。水新魚子散。雪釋馬蹄勻。政可箋河伯。何須詠洛神。桑田今幾許。除籍補疲民。

贈瑛上人住洞林

托鉢千巖裏。松花凍未開。哀猿依講席。飢鳥下生臺。潭影留雲定。鐘聲送月回。山中太古雪。爲寄一瓢來。

送周南翁集賢南歸省墓

搖曳十洲仙。來尋楚尾船。金花榮故里。石筍表新阡。江橘團霜重。冰魚鱸雪鮮。塔前雙玉好。行賦鹿鳴篇。

潞公判永興遊嵩之詩見於翰墨然卒與右軍之遊汝大率相類名爲造物所忌豈虛語哉今見其

孫璋甫佐西省甘棠遺思至是殆將見之

渭水落葉盡。往來餘碧鷗。龍門七十里。雁塔一千秋。弔古麒麟塚。衝風驢糞裘。寒蕪明滅處。遮馬見君留。

劉氏集慶堂

華構出層林。春浮院宇深。小桃分雜佩。新燕掠鳴琴。石乳千年潤。松花百尺陰。紫皇方問道。那許遂歸心。

送蘇子寧和林郎中二首

貂帽護寒沙。冰天閱歲華。斷溪駝聽水。密雪犬行車。雲盡難尋雁。春深未識花。昔人奇絕處。八月解乘槎。

往歲經遊地。寒蕪碧燐深。雲開山後陣。水咽隴頭吟。雪白氈房重。天青羽檄沈。重華新雨露。悲喜候車音。

蘇子寧北行詩二首

出塞黃雲盡。經春白雪多。高樓閒鼓角。絕域靜干戈。風急盤鵬嶺。冰深飲馬河。征鞍遲明發。揮手渭城歌。  
去去居庸道。關山冬氣深。雪天孤帳宿。寒月一笳吟。石堞棲鴉穩。沙場過雁沈。粉闌多暇日。歸騎有佳音。

吳閒閒病起二首

好客頻來往。閒雲管送迎。花香清病骨。松籟答書聲。身世三生夢。乾坤萬古情。故園多蕨筍。歸興繞江城。  
客散庭如水。春深日似年。閒心觀宇宙。浮世閱風煙。詩句吟難穩。蒲團坐欲穿。一聲松外鶴。此意共悠然。

題蔚州郭氏永寧亭

華亭絕市囂。山掩映岩巖。落葉燃茶鼎。長松挂酒瓢。天低雲欲下。春盡雪初消。歲晚無王事。前村看射鵰。

次韻馬伯庸題凌波仙圖

玉衣朝岱日。寶瑟寫湘雲。宛轉鸞歸憶。參差雁過聞。石痕生左角。松影印迴紋。倚竹憐雙泣。摘蘭憫自焚。  
停驂沙磧近。指點認昭君。

伯庸以詩見屬次韻二首

學古陳言少。官清雅詠多。珠玕明玉海。寶鑑挹金波。易賴韋編定。書疑汗簡訛。斯文今有託。爲我補嘉禾。  
聽君人物論。閱世似難多。學禮師倉海。傳家繼伏波。看山窮北戒。惜日愛南訛。彩鳳非無食。瓊山自有禾。

高掾祖父八十



心跡混漁樵。門深絕市囂。花前歌舊曲。燈下話先朝。白髮書千卷。朱顏酒一瓢。有孫遊玉署。從此樂逍遙。

長春道士禱雨有應

清夜轉崑崙。天雷卓午聞。平林千樹響。古澗百泉分。門靜堆黃葉。山空聳白雲。神功滿禾黍。尸坐答鍾熏。

次韻馬御史題漢州喻氏多勝亭

花壓金橋重。春風第一州。江喧朝灌口。雲擁護遨頭。雁落沙中渚。鶻啼竹外洲。使君燈火地。爲我倚高樓。

鶴山年少時守漢州。元夕張燈金雁橋斷。

次韻伯庸過天寶宮

松暝碧雲深。鶴歸人倦尋。朝迴香滿室。祠罷月盈襟。白鳥分山影。黃鸝轉樹陰。小溪流不歇。咽咽似鳴琴。

送白誠之赴台州別駕

岩巖巾子峯。市近海潮通。桂樹團雲濕。松花帶露濃。猿隨僧屐雨。鷗送賈帆風。盡道無王事。持杯百過空。

贈瞿者

尸坐包玄象。虛窗萬籟沈。聽泉知地脈。候琯合天心。風定馬蹄急。霜清葉落深。弄丸端可學。從此罷鳴琴。

送成公履守光州

淮樹連空碧。淮山徹底清。濯纓羞戀闕。佩印樂專城。曬網雲催泊。提壺雨勸耕。地偏王事簡。數雁寫琴聲。

寄開元奎律師五首

開元古壇主。盡日着袈裟。社主勤供菜。天神罷送花。蒲團黃葉護。香鼎白雲遮。終歲無王事。繙經到日斜。  
開元古壇主。老至律精嚴。洗鉢魚遊水。開門鶴入簾。拾薪供茗具。滴露寫經籤。已悟如來意。看花不用拈。  
開元古壇主。身世兩相忘。客至常扃戶。僧來不下牀。神光千里髓。玄辨九秋霜。白葉渾消盡。蓮池任意香。  
開元古壇主。瓦石化丹青。似住元非住。無營類有營。念珠金的磔。戒鉢鐵晶瑩。我亦慙塵垢。清齋養性靈。  
開元古壇主。幼歲已相聞。我竟飄京國。師方玩水雲。一官千日計。萬事五更分。共約修蓮社。空林洗垢盆。  
碧甃侍諸父。拜雙峯祠堂。未嘗敢有題詠。二十年來。接武于玉堂瀛洲。霜露之思。缺然有視。近聞平石長老。興廢補仆。光紹前開。遂述舊懷爲六詩。且申歎仰。

沈沈大士閣。千嶂萬夫降。近樹青禽獨。前松白鶴雙。雲霞生几席。星斗列軒窗。俛首京塵客。生涯愧老龐。  
慚愧雙峯老。光明兩足尊。新收釋迦佛像。午窗鈎竹影。凍筆點梅魂。齋近烏啼樹。禪迴虎伏門。春來有新雁。勸我趣歸轅。

經院辛勤日。千金記始興。創寺時。以賜金千兩。經始今八十有四年。雨荒蟲蝕拱。壁壞鼠緣藤。舊觀丹青復。諸天錦繡承。短簷增突兀。會見出盧能。書來修選僧堂。舊有僧士言。太高。種沙門。滅其柱。然清班亦不聞有顯者。故未及之。

陰陰虞監宅。虞宅。鬱鬱越公祠。掬水不入獻。布金猶受疑。流年翁仲守。往事蕊蕤知。澗水交流處。曾傳玉帶垂。

寒徹清泉底。山童上水華。定金非在井。羅喉羅尊者語。傳昔有一女子墜斂。其水遂定。煮米卻成沙。洗目能生電。搜腸可當茶。人

持一月去。此月落誰家。

跼蹐千樹暝。彈指百花春。道以東巖的。詩於北澗新。歸雲呈住相。行篋掃空塵。靈鷲誰公論。啼猿正惱人。

次韻張希孟凝雲石十詠

我愛凝雲好。神交萬化前。碧窗圍屢氣。黑浪袞蛟涎。化石知何代。出山今幾年。相從清思長。寸穎起蒼煙。

我愛凝雲好。飛塵萬馬驅。雄深壓將士。峭直傲公孤。斷足鼈分極。摩牙虎負嵎。何年化霖雨。慎勿竟虛無。

我愛凝雲好。雍容諫諍姿。虛中超混沌。正色走窮奇。潤物非無意。成功自有時。棲遲元未晚。清坐愧神癡。

我愛凝雲好。氤氳萬象深。鎮浮廊廟體。閱靜雪霜心。屈曲蜂房綴。玲瓏蟻穴淫。玉京誇獨秀。此日汗腰金。

我愛凝雲好。朝昏境不同。金芽養靈谷。鐵網起晴空。月色古今正。潮痕子午中。點頭那有異。吾欲問生公。

我愛凝雲好。神清湛欲留。岷峨千古雪。泰華一天秋。獨鶴離羣皎。層冰出澗幽。無言有深抱。山立正陽休。

我愛凝雲好。模糊老墨仙。癡基端食月。渴驥欲奔泉。守黑壺中日。談玄洞裏天。煙霞元自足。塵世未爲賢。

我愛凝雲好。翛然一榻棲。支機何物誕。醒酒此君低。香遠能爲霧。泉深解作溪。未須鄰綺角。端可比夷齊。

我愛凝雲好。能歸萬古春。遺簪三島客。椎髻八蠻臣。柏子添清供。梅花寫舊真。天心元不動。東海任揚塵。

我愛凝雲好。蒼龍擘硤飛。振纓悲濁垢。整珮謁清微。歲月江翻浪。冰霜玉韞暉。黃塵今幾許。且勿展書闌。

山水圖

樹重雲光溼。峯寒曉氣清。抱琴人欲往。門暗客相迎。凍雨生寒溜。深雲倚怪藤。蹇驢吟不得。指點墨千層。

淇綠堂

卜築荆溪下。碧陰生晝涼。軒昂丈人行。瀟灑此君鄉。月候維山鶴。雲催嶰谷風。衝風朝夕誦。底用別詞章。  
寄砥長老

雙峯不受暑。傑閣稱幽禪。蕉葉綠雲扇。藤花白雪氈。見龍增澗水。喜雁點江天。笑我開平客。于今第幾年。  
送李希白降香武當山

絕壁通靈籟。天香蒨寶華。重明應龍馬。習坎伏龜蛇。度嶺金盤日。穿雲玉佩霞。道逢采苓叟。應與論南華。  
送永新王東野還里

天際風花黑。燈前鬢影蒼。方刊肘後祕。金散囊中裝。某樹童年種。茲丘晚歲藏。已忘朝野事。飛鷺起鳴榔。  
輞川圖

詩中傳畫意。畫裏見詩餘。山色無還有。雲光卷復舒。前溪漁父宿。舊宅梵王居。千古風流在。披圖儼起予。  
贈雪窗上人

少日觀滄海。陰山恨未登。飢餐太古雪。渴飲萬年冰。柳色迷官道。鐘聲動客燈。聞聞與見見。問我一枝藤。  
直沽口

二水赴滄海。客行殊未休。漁舟維病鶴。歸棹起輕鷗。雨重雲光溼。天低樹色浮。京塵今已洗。從此問菟裘。  
三月廿九日阻風馮家口

飄泊春風怒。維舟古渡濱。防堤堆馬鬣。蹙浪捲龍鱗。撇掠吞吳陣。紛披障庾塵。柳陰亭午轉。人靜白鷗馴。  
次韻劉明叟

欲知行路苦。孤雁促歸期。矮屋燈昏際。空林葉落時。滄浪誰欸乃。樵穢笑吟癡。點檢章囊裏。珠璣總屬詩。  
壽閻承旨三十韻

寶曆書堯甲。蒼杓指夏辰。脩齡天保魯。嘉瑞嶽生申。人物中州正。陶鈞淑氣淳。舒晴翹孔翠。墮地擢麒麟。  
藻思傳髻綺。蜚聲起搢紳。文鋪崑玉鏤。賦約楚蘭紉。樂道車中聘。談經席上珍。飛牋油幕佐。執簡柏臺賓。  
黼黻開丹地。絲綸演紫宸。慶雲圖遠牒。甘澤洗荒塵。評論空餘子。儀刑倚重臣。昂昂霄漢表。皎皎雪霜身。  
滄海鷗忘慮。長風驥絕倫。名高諸彥避。德盛後生親。朗鑒中秋月。天和太古春。精忠言款款。獎引語諄諄。  
書葉題文債。詩筒破酒巡。筆翻金井凍。詞吐露桃新。格律常楊陋。篇章鮑謝鄰。辛勤憐我輩。銓賞屬斯人。  
南極呈黃道。東皇挾絳輪。霓旌紛旖旎。香鼎秀氤氳。果熟分金母。丹成養谷神。心澄眸轉碧。光瑩頰浮銀。  
物色歸青簡。年華閱大椿。小車花外影。馴鶴竹間真。賀履聯行整。傳觴捧勸頻。疎閒看遠岫。虛靜傲蒼筠。  
往事雲舒卷。流年肘屈伸。長生端可學。靈壽不須陳。

次韻仲章過陳氏城南書隱十韻

矮屋參差倚。平蕪黯淡看。夢迴榆塞遠。愁絕翠峯寒。白髮游絲罍。丹心古鏡蟠。槐明金瑣碎。菊鑄玉嶺岿。  
憶月時看劍。臨風復整冠。鄉音憐過雁。古調拂離鸞。去矣歌招隱。終焉樂考槃。晚知交態薄。老識宦途難。

口腹非真累。毋煩饋一簞。

入南城遇老醫言山陽舊事因成十六韻

邂逅山陽老。相傳事已訛。姦雄歸草莽。天地入悲歌。太守籌謀誤。將軍禮數苛。鞭囊同下吏。驕御失前珂。  
 渙忍顏如此。憑陵事若何。比肩身肯辱。卻立齒爭磨。水捲寒雲甲。風揮白日戈。耳聞人作膽。眼見血成河。  
 翕霍同么子。倉皇類小幡。官軍奔及馬。婦女走乘騾。自古儒冠忤。難將杯酒和。功成真草草。先公在宥府論山陽事去  
國後維揚論功成謂偶幸。時至復嶷嶷。漂母恩徒快。中郎詠未磨。荀爽為中郎。將有北征時。遺屯迷鼉石。野艾所築。舊浴暗龍渦。土沃村  
 村麥。湖深處處荷。人生貴行樂。何必問銅駝。

壽致政王侍郎八十二十韻

壽俊標周士。儀刑望魯儒。輞川饒詠賦。璜水祕謀謨。壯歲丰神整。明時臚仕殊。東曹誇鶴擊。公府羨鳧趨。  
 審象三韓使。含章四皓圖。長身昂野鶴。正色叱妖狐。誓墓文何早。傳家計豈迂。鄉稱三老舊。人說二難俱。  
 舍並分桃塢。田開別芋區。水邊時避飲。月下屢噴扶。眼碧看山媚。鬢銀映雪癯。油車懸蹠踐。野服綴襟綸。  
 社肉時相餽。春醪不用沽。綵衣新稚子。椎髻古奚奴。鼓擊深深舞。茶烹緩緩呼。花飛迷去路。鳥下避行廚。  
 南極珠分瑞。東泉斗借爨。造朝看賜杖。入里記垂弧。翠柏根如石。靈龜息自腴。從今躋壽域。底用詫康衢。  
 壽牟獻之大理卿七十三十韻

氣壘岷山秀。風神閩苑仙。西州餘故老。南國挺真賢。瑞靄垂弧日。人思衣繡年。清門開耄慶。綠籍紀齡延。

止息功參易。虛心體合玄。厖眉垂素手。漆髮換華顛。今歲七十。眉間忽生兩毫。髮重黑。鳩杖何期賜。牛車不待懸。三鱧傳  
素緒。一鶴記青氈。粉社爭爲壽。蘭堦數擊鮮。風驂追廣莫。雲佩憶鈞天。往事清霜木。希音太古絃。五更尊  
禮絕。六老舊堂專。所居正六老堂遺址。杞菊調饗鼎。丹砂養井泉。慵書乞米帖。羞辦買山錢。醉劇簪花舞。遊疲枕石  
眠。黃公終慕隱。白傅且逃禪。文物傳青史。耆英入繪編。弁山寒戢戢。茗水響娟娟。望海傾朝夕。瞻星候次  
躔。登龍身未武。執雉意空傳。偃仄徒多恨。低違祗自纏。窮鄉真坐井。陋室強懷鉛。夜月思延桂。秋風學詠  
荃。終然羞弱植。復爾滯孤騫。問字蕪空在。傳經席未前。牛衣期振拔。馬磨費評詮。冰柱垂青嶂。蟻珠湛碧  
淵。至言機已息。妙技目無全。凡質丹須換。精誠溜合穿。遡風輸善頌。立雪冀敷宣。

壽李承旨四十韻

寶曆開三禩。瓊章集萬神。蒼龍迴插子。玉兔候交辰。潞水丹騰渚。壺關氣接旻。道傳莘野止。學比傅巖醇。  
帝運昌文統。師臣秉國鈞。清宮高贊畫。潛邸舊經綸。意得超今古。才雄異等倫。春浮霞錯落。秋映玉嶙峋。  
三執中書柄。重開大國鈞。黃鍾陽脈脈。瑤圃霧氤氳。仙鼎神膏祕。宮壺掌露真。恩醲錫麟脯。味薄謝猩脣。  
瞳碧光流漆。顏紅色耀銀。垂紳凝泰嶽。設席陋平津。手挈重華古。心追貞觀新。至人專上壽。八表樂同仁。  
非虎耆年竝。猶龍祖譜親。息深忘蜨化。機靜狎鷗馴。蕩蕩心無競。肫肫俗易淳。極知調鼎鍊。不惜汗車茵。  
竹帛千年事。桑麻萬里春。管商謀可鄙。房杜跡常遵。斟酌扶元氣。彌縫護國珍。倚風憐竹弱。聽雪喜松皴。  
玉署親裁詔。青蒲獨奉宸。蜀江移戍罷。浙土減租勻。楊淨唯烏几。堂虛且角巾。手揮廷下吏。目送幕中賓。

習隱時思許。題詩尙憶秦。黍田溪溜溜。花塢澗鄰鄰。問俗停車緩。貪賢倒屣頻。藥囊儲赤箭。水鑑徹青蘋。蒼海收毫末。空林絕隱淪。籍功文館定。約法論堂詢。出處關吾道。安危佩一身。政須陳蹇蹇。直與紀麟麟。續藝慙班馬。抽才頌甫申。占天徒有管。望治眇無垠。閱歲桃成實。知年海拂塵。扶疎慙小草。葱蒨託靈椿。

送文子方著作受交趾使于武昌長律二十韻

萬里蠻陬貢。清秋督使馳。乘車專述命。受幣聽陳辭。紫舌音聲狡。雕題聚族滋。玉門心愈遜。銅柱約難移。江漢尊南服。星辰拱太儀。趨庭輸齒革。授館列膏脂。私覲情鈎隱。公言理折疵。彈丸空有險。束矢定無疑。桂蠹消煩溽。蒼龜審事宜。要荒工跌宕。保障慎羈縻。鸚鵡寒汀遠。蒹葭晚岸欹。壯遊詩句豁。古戍角聲悲。月矗朱簾正。山低翠浪欺。班超空耿耿。陸賈政怡怡。楚水愁腸結。衡峯望眼眇。過門王事急。去魯驛程遲。緬想垂衣治。深求補袞資。大夫謀可利。小客禮須持。諭蜀徒煩檄。平南漫擬碑。佇看王會傳。端假史臣爲。

魯子暈御史分按遼陽作長律五十韻愛其精密子今歲亦扈蹕開平因次其韻

象御天街正。烏輪海觀昇。省方秋戒慎。扈蹕歲因仍。石迸根駢拇。山迴勢左肱。塵深疑帽重。霧密覺衣蒸。午頓炊難熟。宵征酒易勝。解鞍心惘惘。執轡念兢兢。酪水分罍缶。通薪算斗升。皮毛均製服。脂腴或然燈。統幕迷高下。烽臺閱廢興。度關泉水咽。出口月華澄。狼戾官芻峙。魚麗餽粟徵。千房雲疊疊。萬竈墨層層。列帳排衣甲。行營護棘矜。旒旌環似翼。鼓發去如繩。斗北瞻紅棧。雲西指白登。草肥青穉稔。松聳翠峻嶒。積雪疑忘象。搏風訝徙鵬。屬車攢幄帳。行殿儼茵憑。白氈時逢賈。朱衣定指僧。翠旒遍華蓋。金甕耀觚棱。



觀闕天經界。儀臺象緯凭。伏飛拳似虎。鐵杖足如能。竹帛司常煥。丹青職貢增。會朝珠帽簇。錫宴寶卮凝。陛立齊垂橐。師行陋釋棚。廣寒通月窟。高爽寄涼楹。上聖英資異。丁年武德弘。天戈中夜渡。星檄百川承。同軌嚴行夏。明禋恥用鄩。別州端首冀。分器定先滕。德啟無疆服。光傳有道曾。皇威宣絕漠。陽澤散堅冰。表正辰居所。漸仁水集塉。庭開下鳴鳳。苑廢罷飛鷹。舉逸尊加璧。掄才鄙販縑。鄧林搜八柱。瀛海取三凌。曲學慙繩祖。孤聞賴得朋。沈思雲外弋。冥索澤中罾。客議雞同鶴。人疑驥聚蠅。濡毫終有思。執簡豈無懲。謂可兼遐邇。胡云立愛憎。清芬蘭佩結。芳薦蕙殺烝。鴻筆吾誠忝。轄軒子累乘。共知心耿耿。相對髮鬢鬢。馬磨誰憐許。龍門共企膺。枚生詞過實。揚子德徒稱。盛化乾坤闢。王綱日月恆。麟符昭炳蔚。豹霧駭超騰。虛白難爲繪。空青不受贈。欲追千古筆。爲付一枝藤。

王趙公八十應制十韻

耆德膺熙洽。皇風協泰和。公明旁作稷。帝念敘惟歌。粉社新封土。蓬壺舊隱窩。黃公資輔翼。白傅退婆娑。望日靈龜息。擎雲古柏柯。精神霞爛爛。儀觀玉峨峨。設醴樽浮蟻。兼珍釜錫馳。擁牀爭置笏。立馬會鳴珂。服食丹藏井。絲綸錦簇窠。永須依日月。何必問煙蘿。

壽開府承旨十韻

泰嶽舒紅日。天門爛紫霞。氤氳生宰輔。磅礴贊亨嘉。文武揚中外。寬嚴接邇遐。遊嵩雲擁馭。度磧雪飛沙。畫戟車流水。青編筆有花。精神春不老。器宇海無涯。玉殿彌綸重。金鑾密勿華。傳宣花似斗。錫宴棗如瓜。

上壽三千歲。元勳第一家。山河開賜履。早晚聽宣麻。

劉邢公九十應制十二韻

賜履光華閱。延齡冠帝畿。氤氳秋露嶽。菌蠢露凝芝。六聖存遺老。千官介壽祺。傳宣鳩飾杖。錫宴蟻浮卮。餐玉銀鎔頰。簪花翠壓眉。灌陰機帖帖。擊壤樂熙熙。坐石雲生窟。澆槐水溜池。霜深風脫木。冬暖凍消梨。往事先朝夢。多情舊日詞。魯公方拜後。鬻子定爲師。用拙長年樸。虛心太古蓍。成功全靖退。樂道過期頤。

次韻伯庸畫松十韻


妙思通靈素。玄陰接帝青。抗顏躬蹇蹇。蒙頂髮星星。颯爽龍羞象。蕭疎鶴鍊形。壁虛生地籟。斗近界天經。蜨夢春濤湧。蟲疑曉日冥。雲生停翠候。風入倚窗聽。屈曲車連軫。騰擎鱗列庭。戀鄉思海岱。封爵鄙云亭。月落孫生嘯。天寒屈子醒。雄姿輕虎豹。浮跡陋鷗鷺。

壽張希孟父郡侯八十二韻

古渭垂綸老。康衢擊壤翁。星輝騰處士。天爵賁家公。顯氣西郊肅。祥雲北渚濃。坐班鳩杖叟。舞轉柘枝童。壽骨英光聳。厖眉厚德充。九重恩誕錫。三命偃彌躬。麟紱開華旦。龜齡擬少嵩。簪花便廣穎。植菊塋方瞳。鼎釜兼珍飫。刀圭上藥融。傳宣壺燦爛。合宴珮青葱。積慶先猷遠。詒謀晚福豐。靈椿培世範。玉樹挺家風。正色通天闕。高懷納楚宮。倚風看雁北。就日見雲東。君父恩彌重。交遊論盡同。竭誠心翊聖。移孝思忡忡。意壯追奔馬。機忘數過鴻。玄參揚子衍。書比伏生工。浩蕩漸摩澤。昇平挾此功。定須超混沌。何必問崆峒。

王叔能侍丞相入見王繼學尙書序其事謹賦十二韻

行殿圍瓊邸。變輿擁翠簾。重華方聖治。上宰益勞謙。臺閣推公幹。蒿萊擢孝廉。官儀精考核。選格絕停淹。議禮心如穀。探賢手自籤。都曹清望重。瑣闥雅才兼。對榻褒嘉寵。垂紳俯伏瞻。傳宣桐酒錫。拜命襲衣霑。令節薰風細。皇恩湛露厭。事殊靈壽杖。賜比水精鹽。際遇喧朝野。矜誇徹里閭。遺臣思載筆。往恨泣攀髯。



# 清谷居士集卷第十

## 律詩 七言

廉右丞園號爲京城第一名花幾萬本。右丞有詩。次韻。

閉戶春深詩祟侵。卷簾新燕掠清陰。亭亭梅月能消酒。肅肅松風獨和琴。新筍未容穿石徑。落花時許補雲林。主人妙手隨機轉。萬本姚黃磨紫金。

禊日與剛中待制至廉園閉門不內。駐馬久之。復次韻。

雲鏤亭臺煙霧侵。難將禊迹擬山陰。花飛竹外疑紅袖。水度松間自玉琴。駐馬客迴迷遠路。倚闌人在隔清林。誰言洞口無消息。一見應須直萬金。

送孫道士歸杭

送雁南飛十五年。朔風吹雪上華顛。梨花的的疑蝴蝶。燕子深深似杜鵑。東野先生愁外句。西湖處士夢中緣。抱琴獨去知無奈。一棹春江水拍天。

次韻王寅甫侍讀莅醮長春宮

飄飄笙鶴雨絲輕。聽徹靈瓊曲再成。玉案香分花有影。瑤階松暝露無聲。九枝燈裏開眞景。三素雲中賀太平。莫怪錦袍衣袖冷。還家從此羨長生。

蛻骨棱棱似鶴輕。觚壇危處玉爲成。天街正候三能色。雲所疑呼萬歲聲。氣象通靈歸廓落。心章祈歲報清平。金穰上瑞吾皇意。不用神芝朵朵生。

題張宗魯編修詩集

雁蕩峯寒晝飲冰。碧雲爲構玉爲椽。已除白髮三千丈。疑上瑤臺第幾層。松頂露涼旋整鶴。原頭火淨撇游鷹。何人妙解清新句。剔盡風簷一寸燈。

送李伯英秀才歸廬陵

黑頭徒步謁神州。蔌蔌飛塵鬢已秋。日暮競傳鸚鵡賦。天寒誰解驢驢裘。雁聲未歇砧聲續。燈影初銷月影流。可是親知留不得。故園清興起滄洲。

次韻答周秀才

湛湛玄雲起研山。桃花爲色玉爲顏。溟鵬水擊三千里。天馬風生十二閑。芳草春濃堪試筆。長空秋盡獨憑闌。松階翠影流如滴。遲子攜書共往還。

次韻成季灤陽見寄

客思如癡日似年。晚風投幘思悠然。看山不逐馬蹄去。得句時從雁足傳。紅綠芰荷秋岸岸。青黃蒲稗雨田田。尊醞有興愁無奈。欲問渾河下水船。

次韻陳又新

登臺底用惜春菲。平楚微茫落照時。燒後斷碑遺鳥跡。耕餘殘壁隱蠶眉。泉分去路蕭蕭玉。山聳歸雲簇簇旗。駐馬應須更搔首。遠煙迴雁不勝詩。

西湖空濛圖

舊隱湖山筆底收。相從京洛意中游。昏昏車馬飛花雨。寂寂鍾魚落葉秋。千古登臨翻昨夢。百年歌舞漾清愁。何當化鶴看滄海。不用呼猿汲澗流。

次韻張秋泉盆梅三首

萬里南來帶白雲。低徊猶作自由身。孤根留雪疑無伴。冷蘂餐霞別有春。頗憶西湖頻入夢。不煩東井與生神。相看歲晚真清絕。疑是瑤臺第一人。

深明閣裏江南樹。老鶴翹翎似病身。紙屋藏雲團白雪。丹臺朝日補青春。蒼苔有恨悲山鬼。翠袖無言倚洛神。回首空林歸未得。淒涼相對獨關人。華頂空餘萬疊雲。獨將清影伴吟身。虬枝欲挾窗前月。驛信能通塞外春。底用施鉛鄰越女。從教翦水恣波神。碧虛仙客清無奈。留作新詩故惱人。

次韻仲章游南城二首

瑤閣雲深野馬昏。分明日月引天門。峯迴九鎖疑無路。水過三叉別有村。頗怪鶯花春不負。卻嫌雞黍約難存。山童閉戶茶煙暝。客至從渠未許論。

側身千仞苦不早。愛此春從天際浮。北雪西山憐我瘦。黃塵白日送君游。翩翩目送雲中雁。杳杳機忘海上鷗。今古登臨總陳迹。倚闌何事起清愁。

贈王君佐

精神映日碧芙蓉。直節昂昂衆不如。十載長安心似水。一官淮海食無魚。少年已擬治安策。晚歲肯爲封禪書。聞道功名須皓首。鐵冠簪髮莫踈疎。

送蕭立道歸天台

華頂雲寒人不到。煩君爲上最高層。天雞正叫三更日。海鶴曾餐六月冰。客路微茫同脫木。鄉情依約近歸僧。還家莫作採芝叟。背負青天做大鵬。

送李景山使交趾

萬里雲南把一麾。日南重見使車馳。思家不作玉門表。得句擬題銅柱碑。象譯舊傳周禮樂。馬人遺俗漢威儀。枕榔溪驛疑飛雪。樹樹梅花九月時。

九日書懷

烏帽衝塵鬢漸皤。黃花慵插獨婆娑。新霜去雁天機少。落日歸雲雨意多。拄笏看山真我事。持螯把酒爲君歌。登臺欲盡鄉關望。一徑松陰長薜蘿。

慰曾道士



積構層巔聳玉臺。松花浮翠雪。醴醴終然一笑騎鯨去。可是長眠化蝶來。身外乾坤憐納芥。壺中日月隘浮盃。何人欲問先天事。隱几蒼髯換不迴。

抵滄州先簡善之應奉

黃金臺上英賢滿。白玉堂中步武新。愧我清塵暗顏色。羨君碧眼映精神。春風未信看花少。午夜應知視草頻。北望五雲開曉霽。相思那得勝相親。

送李彥謙赴西臺御史

百二山河驄馬游。西風渭水思悠悠。鶴翻古柏千年雪。鶴擊平蕪九月秋。拄笏漢陵尋玉雁。解鞍蜀道問金牛。官曹朱墨何時了。一榻清吟是勝流。

張虛靖圓庵扁曰歸鶴次韻

招仙游館構亭亭。萬疊松寒曉日青。玉局講殘春換劫。石臺丹在草通靈。紅羊赤馬悲滄海。白虎蒼龍儼大庭。爲愛子喬笙鶴美。月涼時許夜深聽。

送華道士降香武當山

神君壽與玉皇同。歲歲香傳第一峯。龍虎使來紅日擁。龜蛇靈在碧苔封。萬年松子天風奏。九節蒲根澗水春。博士文工成故事。石牀爲採玉芙蓉。

送虞伯生降香還蜀省墓

玉雪祠官貂帽低。笑乘飛燕上天梯。寶幡繡重團金粟。鈿合香嚴印紫泥。官僕每供千歲鹿。驛程深聽五更雞。流沙可是河源地。搖首揚鞭更欲西。

丞相墳前雙闕摧。泉聲隱隱柏崔嵬。金牛已向秦中去。銅馬空傳渭上來。叢竹雨留銀燭淚。落花風颺楮錢灰。百年華表塵千劫。聞道曾孫始一回。

再次韻

振衣千仞笑雲低。捫歷星辰履劍梯。度坂政須三尺筮。入關應笑一丸泥。神君祭重祠青馬。墨客才工頌碧雞。萬里遨頭端不負。花開緩醉玉東西。

閣道新年舊石摧。望鄉使客意嵬嵬。犀牛坐見降王去。杜宇聲隨望帝來。三卯錄成魂有憐。五丁神泣劫揚灰。推飈欲作鄉隣會。揮手先催弩矢回。

三次韻

觸石危藤壓路低。哀猿送客上丹梯。一百八盤雲亦雨。二十四番花似泥。解佩浮游憐野馬。振衣亭育聽天雞。拾遺已去武侯遠。空戀祠堂與漢西。時平弔古莫心摧。去驛斜陽指馬嵬。曲曲松陰隨帽轉。層層山影入杯來。草玄有意池留墨。觀象無心筓畫灰。爲問丈人今在否。青牛穿嶺日千回。

送王繼學修撰馬伯庸應奉分院上都二首

玉京高處雪流脂。連插雞翹綠鬢垂。蹀躞有泥歌獨漉。琵琶無夢說相思。黑河舊樂催填譜。白海名花擬進詞。羽獵上林俱罷賦。卿雲何以報明時。

淺坡平疊積漫漫。拂嶺青帘罨畫看。羶屋起營羊胛熟。土房催頓馬通乾。桐官走驛傳金碗。冰正分盃貯玉盤。莫上鄉臺望南北。白雲微處是槍竿。

寄王儀伯太守

維揚太守文章伯。故壘荒煙取次題。逆浪風高淮白上。寒沙雲落海青低。極知后土花如雪。不惜平山醉似泥。跋馬使君官驛畔。揚鞭卻在夕陽西。

壽劉承旨

茲審齡開希有文。潤太平。玉杖造朝樂堯堦之化日。銖衣拂石歌舜殿之薰風。壽擁靈椿。歡傳故梓。敢陳善頌。庸贊令辰。

棲棲鶴髮映方瞳。玉帶桓圭一品崇。禁署清名行世久。高門盛德與天通。升堂衣竝老萊子。做國詩傳衛武公。共道榴花宜結實。綠陰濃淡駐杯中。

孟習卿都事母八十歸省關中。其家四世科第。祖十五當金亡時。舉進士。終待制。

鶴髮初開九九年。東西雙鳳集庭前。乃兄官燉煌。亦歸壽母。篋藏龍榜金花淡。案捧鸞書鈿軸鮮。竹筍清甘宜夕饌。

萱花芳遠傲春妍。風流文物關中舊。點檢諸孫射策編。

送李元章宰陝縣

稅冕觚壇匹馬歸。冥鴻斜日悟天機。明時法律心常鄙。小邑弦歌願豈違。潁水初霜黃葉下。華山新雨碧雲飛。當今人物須公等。行見鋒車入帝畿。

次韻李伯宗苦熱

庭院無眠夜氣深。繁星閃閃漏沈沈。祀融燉火翻初劫。姑射疑冰易舊心。角枕雲蒸紋欲斷。蠟燈煙暖淚難禁。蕭騷忽作還家夢。翠木扶疎萬竹森。

次韻程士安睡鶴

疏翎慵受朔風侵。谷口雲歸自在心。蜨化不知人事改。蟻酣空憶世塵深。珠宮胎息天濤靜。寶所神游斗柄沈。何事驚烏繞林樹。月殘衝曉議晴陰。

次韻陳海陰

三月雪花飛作氈。春風似欲駐新年。夢當好處成烏有。歌到狂時近自然。村樹綠齊黃鳥界。海山青盡白鷗天。何人會得龐公意。布領長披不上船。

次韻院長退朝書懷兼送李元章廟令三首

踐阼篇陳夙致齋。明良慶會叶榮懷。南山豹豸文章潤。嶠谷鳳鳴律呂諧。黃閣規模深倚注。金鑿人物費推排。夜光照坐羣傾動。誰道驪龍左耳乖。

朝迴深坐碧雲齋。無限家林入素懷。整頓乾坤新禹貢。翦裁冰雪舊齊諧。舳舻望日紅蓮擁。蹀躞看山玉筍排。魚水政親那棄得。白鷗相對莫相乖。

會着蟬冠會宿齋。陽春玉雪映澄懷。黑頭瑞世須奇遇。白眼論交自寡諧。驥裏當塔身獨障。有乘馬入廟門者叱出之舍桃薦廟手親排。蕭蕭匹馬投山縣。人事相摧似好乖。

### 題餼齋

蒙蒙眇眇傲滄溟。差殺任公夢未醒。寄館蠅鬚猶綺靡。深藏黍粒獨清寧。掌中旋舞憐飛燕。案上能行笑巨靈。惆悵九衢長劍客。駢肩堂下慕遺腥。

### 送東平程太守

泰嶽巖巖鄆水清。分符投老得安榮。百年禮樂維時舉。比屋衣冠合旦評。馬鬣舊封蒼檜老。龍鱗古殿綠蕪平。高唐路近羊生泣。東望憑公爲寫情。

### 送周南翁分刺池陽

柳亭松露十分甜。秋浦天青雁拂簷。黃葉滿庭君吏隱。白頭掩卷我郎潛。風催帆影迷紅蓼。江送歌聲入畫簾。惆悵九華金碧洞。謫仙人遠月纖纖。

### 次韻雙頭菊三首

袖舞西風大小垂。駢頭容立傲霜姿。步搖高擁車同入。笑靨初鈿坐共移。素質斷金疑竝蒂。閒情餐玉喜

浮眉蓮池睡冷鴛鴦起似怨秋聲有恨離

碧雲低壓玉繩垂鸞鶴交翔表異姿白帝司秋金已肅黃人捧日馭初移藥宮罷講扶雙鬢桂館霜餘卻  
十眉剩掃雕搜兒女態象中明兩見黃離

空庭雲盡露珠垂翠羽交分大雅姿氣服中黃心獨苦光浮大白眼爭移智瓊有約徒誇額京兆多情卻  
畫眉桃李爭妍真不遜故留雙玉伴支離

閣阜山青玉軒晦庵容齋諸賢觴詠之地虞伯生作記吳成季令賦詩

江南琳館蕭閒地一一新文付集賢真誥總傳天外語禁經未數酒中仙步虛巖近琅玕響禮斗壇空薜  
荔緣諸老會文題詠絕誰將鳳觜續離弦

題揭曼碩詩卷

深湛妙思筆鋒收的的冥鴻楚岸秋直以紫芝招綺夏擬將白羽定曹劉松濤夜漲驚金谷花雨春濃爛  
錦洲此意徊徨人未識期君翫月上南樓

送衛大隱回錢塘

衛清叔曾孫

謔謔中丞骨已仙滄洲漁火起寒煙魏公賜宅猶傳笏元子磨厓可賣錢夜雨鼠鬚編素業春風塵尾話  
行年西湖雲鎖梅花凍休浪狂歌酌酒船

送華道士住宗陽宮

黑髮祠官佩水蒼。萬松深處對虛皇。黃柑有法能爲酒。紫朮無飢可當糧。招鶴舞虛山月冷。檄龍吹雨海天涼。瑤池欲問長生事。汲澗研朱寫綠章。

翦刀草

手截溪流護翠苗。層陰淡蕩碧雲嬌。秋風玉殿釵留股。晴日朱筵舞折腰。眉缺可能分燕尾。頂荒猶解插雞翹。翻思往歲南方厄。羣采空陂恨未銷。是此一名翦刀。一名燕尾。爾雅是也。南方饑歲探食。

馬伯庸擬李商隱無題次韻四首

金縷歌殘月滿江。玉顏曾憶侍油幢。象牀雲重恩專壹。鯨錦波翻賜疊雙。春淺正宜氈作幕。夜涼深恨鈿爲窗。浣沙可是無靈匹。側足寒溪濺石涼。

翠簾匝匝護朱光。千葉宮桃滿院香。閨苑有鸞通尺素。靈橋無鵲寄流黃。上林賦罷歸巴蜀。興慶詞工謫夜郎。不是月中親度曲。世人那解聽霓裳。

相期心似石城潮。日望晴虹結彩橋。卻月眉愁歌漸遠。凌波步近意非遙。抽琴有恨迴清角。疊袖無塵轉綠腰。弄玉最憐隨鳳去。秋來誰與伴吹簫。

白髮詞臣兩耳垂。華諛堆笏陋牛醫。宮娥引燭催麻日。院吏傳更寫制時。蠟然化生秋夕賜。翠標疊勝歲華移。低頭欲說唐朝舊。願侍虛皇進玉卮。

送浦如淵辭官南歸

厭聽朝雞擁被吟。吳船水滑碧千尋。平洲種橘清霜重。小墅栽花綠霧深。瞿鵠真能談孟浪。鴟夷端自愛浮湛。因君搖蕩還家思。燭影秋房恨不禁。

送李公敏薊州之官

幼着儒官佩楚蘭。文章元不給飢寒。風前野馬停盃卻。天際冥鴻拄笏看。作計政須千樹栗。養生那用九還丹。偏州事簡登臨足。花下題詩更倚闌。

劉婦表門

王中丞妹

空林露下菊無馨。玉雪深闌養暮齡。河水汎舟雲耿耿。湘潭鼓瑟雨冥冥。夜燈孤雁鳴何切。古鏡離鸞舞已停。晚歲不須多感慨。雙楹高亞柳枝青。

永新曰氏義門

銀髮稜稜鶴骨尊。舊傳庭誥付諸孫。要同公藝書芸館。還擬自倫標楔門。春酒緩歌常棣雅。夜燈深候鶴鴿原。他年欲向廬陵客。詢是瀟岡第幾村。

送柳唐佐出守懷孟

甬道塵深曉倦趨。河山環抱暫分符。花開屬縣詩頻賦。竹暗名園酒易酤。積雪翠峯通小有。祥雲朱邸接虛無。寇恂可是專河內。入覲應須馬疾驅。

次韻大亨待制賦院中御馬櫻花



華林清切謝塵纒。坐閱朱英不下堂。九就當胸猩血淺。六鷗飛翮雁行長。擎天力重朝承露。向日心專夜斂香。清蔭政須容小草。肯同羣卉鬪妍芳。

賦文子方質管亭竹影五首

質管亭裏晝天然。穠淡疎明筆有玄。水底青蘋羞宛轉。月中丹桂妬嬋娟。錯刀側布難爲贈。鈎鎖橫陳不受填。午夜碧窗人獨坐。分明清派出丹淵。文興可號丹淵集

瑣窗午色墨花鎔。側側低低隔面濃。日暎黃離金瑣碎。雲開白賁玉瓏鬆。蕭疎忽印青禽獨。旖旎疑分翠羽重。二子定知忘食色。高齋今喜見遺蹤。

霧縠禪衣綉翠裳。倚風蕭瑟轉琳琅。縱橫直欲攻堅白。濃淡渾疑搗硬黃。劍氣低昂動天地。神光離合幻陰陽。陶生久矣知形累。歲晚沈冥託贈章。形贈

玄覽功深萬化遺。一窗光透白差差。梳風櫛雨呈千手。卻月橫雲鬪十眉。形蛻已忘身有累。神交應許我相知。暗中摸索誰消得。阮籍途窮眼未眵。

朔吹南塵久避招。閉門白醉獨逍遙。玉淵龍起鬚騰擲。銀箔蠶登繭動搖。露井珠輝湘女淚。雲屏翠暈沈郎腰。象中直欲窺參伍。肯學紛紛个字嬌。畫竹家是个字

栗氏玩芳亭

納納羣芳入小亭。嵐光霧彩思沈冥。飛花成列粘棋局。高樹參前列畫屏。鶴避晚煙茶半熟。鶯啼午日酒

初醒。春風可是饒紅紫。一片蒼痕眼倍青。

送牟景陽信州監征二首

風帽霜鞍絳闕邊。晚隨陽雁度新年。榻前諫笏家猶寶。架上經箱客總傳。世事不知蒼狗變。機心端與白鷗眠。冰天車碾淮南路。痛嚼梅花一惘然。

上饒山蕨水精屏。江左諸賢冢樹零。鬼谷橋寒松化珀。仙巖土暖草通靈。丹鉛有法供烹煮。筍蕨無租給使令。盡道中年多作惡。相看鬢影各星星。

送巨德新四川省郎中

金鑾清密簿曹稀。拄笏看雲數雁飛。蜀省地尊卿月重。漢江家近使星歸。草堂舊詠迷陳迹。石室殘經臥落暉。戰壘已從芳草換。未妨晴雨眺摩圍。

退食公庭日未西。浣溪清雨換障泥。籌邊舊式傳銅馬。弔古新詩問石犀。荔子綠陰鸚鵡過。杏花紅影秣歸啼。遨頭雅集須頻領。不惜輶筒取次攜。

送樂德敬甘肅儒學提舉二首

磅礴坤輿總帝圖。手提文印化沮渠。旋宮更問涼州譜。尙右時通楚國書。枸杞夜號端入驛。蒲萄秋落易盈車。飛沙斜日頻回首。歸雁相迎亦惘如。

月支城下泉如酒。祈連山前雪似沙。虎頭萬里飛驎嶽。蜺夢五更驚塞笳。范老籌邊心磊嶷。李王堅壁骨

槎牙白頭太史欲歸去。時立東城數暮鴉。

示從子瑛

聞子欲通靈寶祕。天台洞客眼深青。弄丸底問月消丙。服食那能老復丁。隔竹引龜心有想。按圖索驥術難靈。吾衰端有先天易。不用山中採茯苓。

送玉筍山聶道士

五月淩風龜殼船。梁山深灤白鷗鮮。神清似飲金莖露。病已何須玉井蓮。墨閣小春刊畫錄。碧窗新月補瓊篇。相親每憶相忘處。北望歸鴻倍惘然。

人日立春子昂承旨賦詩次韻

鳳曆調元二節并。泥牛華勝得相迎。翦花欲擬丹心巧。繡菜深憐白髮生。日轉扶桑瀛海曙。陽迴析木歲華明。登高可是無芳思。歸雁南來倍客情。

帝京節物喜相并。挾日晴暄淑景迎。鳳輦雲開人共仰。烏輪海轉子初生。是夜亥正立春明日甲子岸容梅柳風光動。澤腹魚龍水氣明。誰惜玉堂春晝永。汗青無補若爲情。

書懷寄從子瑛二首

越公舊築鄞江宅。風捲飛花劫火新。子竟尋眞餐白石。我方作史玩青春。金張麟綬本欺世。王謝烏衣亦可人。誓墓政須堅晚歲。雙峯擁髻碧嶙峋。

當年羣從玉參差。炙轂談天不數奇。翦葉舞空山鬼泣。唱籌量日曆人疑。深春柳下爭飛騎。小雨花前鬪弈棋。我最少年唯閉戶。篝燈煮藥學題詩。

送李仲因雲南憲使

鋒車春倚少城邊。上冢還家思惘然。就日雲低天尺五。圖南路近里三千。相如作使文如綺。諸葛籌邊筆似椽。自是蓬壺舊仙客。望瀛新曲雁飛傳。

送馮士啓淮東憲司幕長

遠涉江湖奉板輿。離亭柳色易枝梧。英標共擬崑山玉。符采堪鄰璧社珠。土甌煙高溼黃草。沙溝水淺漲青蒲。煩君敏手須暮月。天際回朝認烏鳧。

送李仁父歸高安

枝藤雙屐玩青春。廿載登臨筆有神。東海競傳垂釣客。南山曾恥上書人。解凌水滑千帆直。禁火煙消萬柳新。從此閉門聞見絕。高齋顏樂養天真。

送王繼學御史分司汴省

松階竝對影參差。君竟乘馳佐聖時。每恨同情不同調。可堪相送復相思。楚山春夢行雲識。汴水秋聲落葉知。我老江湖盍歸去。少留定刷錦囊詩。

院長有子在外從許州募得之院中率賦詩

袞繡門楣五色新。明珠還浦竟相親。月中顧兔分傳的。天上麒麟抱送真。仙李蟠根元指姓。露桃食實始知春。青箱萬卷能傳業。佇看它年演世綸。

題東平張善父野堂

秦嶽當軒積翠環。野堂高築稱身閒。深春藤槿花溪醉。小雨芒鞋藥市還。九老尋盟歌窈窕。諸孫勸壽舞斑斕。客來欲說人間事。松滿疏簾月滿關。

贈姑蘇陳生

蘇東昌遇大水買舟渡避水者二千得官。

清秋水落渺無津。河伯登林竈有鱗。用力定知非一日。論功何止活千人。放龜晚歲川如掌。渡蟻當年筆有神。堪笑乘輿溱洧者。孤舟空續竟摧輪。

送鄭景尹游麗水

冰雪長身映漆瞳。峇峇深處珮青葱。碧窗讀易猿啼樹。石洞題詩鶴舞空。強項政須消世慮。折腰元不爲身窮。玉堂倚馬須英俊。佇看鵬程振祖風。

次韻院長新製安車

禁路縈迂雪護沙。老來丞相許乘車。向推紅日頭如葆。今看青天眼未花。馬識輪聲嘶外廐。鶴追轍迹過仙家。似聞相杵新堤曲。歷錄催朝扈翠華。

送張道士降香龍虎山

天香歲歲下名山。雪浦春融作使還。鶴引老樵渾碧眼。燕迎舊主的朱顏。雲浮玉佩身疑舉。霧結層樓手可攀。暇日須回侍郎宅。好題修竹聽潺潺。饒州張待制之族孫。

寄賈酸齋待讀

解珮瀟湘已廣騷。因風更望子胥濤。身輕舊食青精飯。思遠新貽金錯刀。紅蓼秋清堪數雁。黃橙霜熟且持螯。龜趺林立嚴題品。得意那無一字褒。

次韻蓬萊暢師

西山秋冷雪皤皤。駐馬頻聽出塞歌。短艇水生歸雁急。故園春盡落花多。登山見月雲光淡。坐石臨溪樹影峨。海上故人機事息。詩來勸我老漁蓑。

次韻天童岫禪師


太白峯高積翠明。老禪的的寄深情。相思沙磧唯懷瑾。獨立鄉臺近子卿。舊業久荒松露立。浮名空眩檣朝榮。定須結社修真隱。寒月深燈了梵經。

吳門頴上人年甚少訪余田舍且惠詩次韻

草舍苔深徑已荒。何人着屐試初霜。飲冰喝石精神聳。衰茗跑泉齒頰香。愧我歲窮驚浪走。愛君年盛鄙清狂。古松流水平生願。後會蒲團共燭光。

冀寧徐母表閭

月落孤幃霜滿墀。篝燈深護裯中兒。肯爲別鶴相思操。得見慈烏返哺詞。槐柳拂雲森宅里。芝蘭擁砌映門楣。高堂釘坐雙眸炯。時說初年涕淚頤。





# 清容居士集卷第十一

律詩 七言

## 過揚州憶昔六首

令威化鶴千年返。列子御風旬日游。已信銷沈同此意。莫將寂歷起清愁。江流今古空陳迹。山色有無知。幾秋赫赫當年成底事。斜陽明滅隱滄洲。漢東之國古隨州。一老昂藏死即休。黑髮虎頭真骨相。青春麈尾鬪風流。人言謝傅爲朝鎮。誰信鍾儀作楚囚。浩蕩乾坤納今古。好將汗簡寫千秋。空遺蒸壤白如銀。不見當年指畫因。高視漢庭無出右。清談洛學竟成真。極知羽扇爲癡具。更恨烏衣是偶人。六合車書端有意。百年荆棘已生春。蕭蕭凍雨濕旌旄。猶著殷紅舊戰袍。金盃昔聞歸馬埒。牙牌誰肯信龍韜。樓頭換箭鼓聲急。堂上傳盃歌韻高。到底姦雄有真態。木綿庵畔鬼車號。連檣米艦接江湄。鞭撻東南力已疲。虛籍漸成藩鎮侈。辟書時被廟堂移。清風號野黃蘆淨。亂雨傳更畫角悲。從此甲兵端不用。書生有味老清時。四城賦擬張衡麗。十鑑書同賈誼哀。公有四城賦。江東十鑑。腹裏春秋納雲夢。案頭今古起風雷。青衫不受折腰辱。

舊對越溪爲郡守屬文翁効去白眼豈知徒步回乙亥屬道歸里舟泊城南更回首寒風吹淚下天台此詩屬胡

觀物

黃河不信從天下濟水那知有伏流自古乾坤合神化空將簡牘費冥搜張華博物身終死鄒衍談天舌  
竟休我亦從今銷綺語春風碧眼玩沙鷗

客中端午簡善之

海城紅憶石榴新海子空看芍藥春節物似憐游客風埃終媿醒吟人已無蒲酒澆清恨那用蘭湯浣  
素塵健羨南坊鄧供奉團欒圍坐笑歌頻

再次韻

尙憶山城節序新榴花疑是十分春田園處處祠蠶祖浙間以端午祠蠶定絲價門戶家家插艾人可怪詩人成白眼  
卻從車馬識紅塵思家那似攜家樂尊酒招邀莫厭頻

次韻酬王參議

槐陰散髮亭亭午花影持盃拍拍春佳節擬酬懷古意清風不礙笑雲人光陰滿眼消黃燭世事忘言煮  
綠塵相望江湖知已久相親杖屨莫嫌頻

玉堂合歡花初開鄭潛昭率同院賦詩次韻

一樹高花冠玉堂知時舒卷欲雲翔馬嘶不動游纓聳雉尾初開翠扇張舊渴未須餐玉屑嘉名端合記

青裳雲窗霧冷文書靜。留取餘清散遠香。崔約古今注。青裳一名合歡。今但名合歡。而青裳之名不著。

笑壓春菲綠滿堂。翩翩清暑獨高翔。錦雞朝日輕霞吐。彩鳳舒雲密翠張。中散舍傍銷綠綺。婕妤扇底泣

黃裳。芭蕉可是無情思。一展隨風不解香。

風流一老笑烘堂。解佩看花欲共翔。夜露未晞歸翼斂。朝陽初旭怒髯張。霧窗不用青綾被。天闕誰縫綠

縹裳。朱槿黃葵效開斂。爭妍那得有清香。

次韻鄭應奉苦雨

漏天有術那能補。息壤無功不願豐。漠漠雲陰來委羽。昏昏水氣接垂虹。吳門水甚。車塵已逐油泥黑。龍火

渾疑野燒紅。萬里乘除同此意。相看咄咄且書空。

觀閒閒齋紅梅次蘇公姿字韻四首

莫恨飛瓊花信遲。相看冰雪已芳時。藥珠霞補春風面。萼綠雲開旭日姿。骨相未須嫌火色。精神真欲傲

冰肌。何人瀟灑紅綾裏。巧暈輕煤畫折枝。

臘底飛甕瑞已遲。天將降雪報清時。施朱可是良工手。補袞端歸大雅姿。溜溜溫泉傳賜浴。斑斑辱井愧

淪肌。閉門已覺寒如許。迴首江南竹外枝。

雲閣香溫睡覺遲。不堪殘角曉鐘時。玉妃瓊屑難為從。青女鉛華敢弄姿。可怪鮫綃能幻色。誰將猩血解

填肌。團團似就迴文錦。薄暮凝愁下翠枝。

筆底冰清落句遲。花神已報艸陽時。疎明不作顛狂夢。嫵媚猶存諫諍姿。酒力衝寒端著臉。枕痕破曉欲侵肌。道人不愛人間色。乞取初開第一枝。

壽善之

二月柳青春滿枝。十分蕉葉不須辭。黑頭政謝赤松子。碧眼故憐黃口兒。玉井蟾蜍吞暗浪。錦袍蛟蜃舞游絲。雲窗松暝文書靜。蚤晚行修野外儀。

次韻仲章游長春

積翠中天下土昏。坡陁深處轉金門。松間不遇采芝客。雲裏空憐打麥村。華表鶴歸城已換。滄洲人去柳空存。高堂靈骨疑金鑲。應許重游得細論。  
八極端能合寸眸。丹梯危盡覺身浮。手持玉笛誰爲贈。背負青天我獨游。山影西來疑駐馬。雲光南去似輕鷗。人間底用重迴首。樂極無愁果有愁。

次韻仲章舟中思南湖

綠陰濃處彩毫揮。忽憶春殘理棹歸。約略晚花圍錦幄。招邀稚筍試斑衣。長年客影如雲度。五月湖光似雪飛。從此清林供笑傲。莫看迴鴈損天機。

再次韻

到手清觴不用揮。滿川帆影逐風歸。花前自憶堂前竹。道上重看身上衣。虛牝鳴秋通澗急。伏雌驚曉隔

林飛。還家絕勝從游樂。只恐雲窗趣斷機。  
倦客慵將麈尾揮。倚篷日日聽催歸。澄波自映烏紗帽。小雨深憐白紵衣。花徑春殘人獨立。松林雲冷鶴孤飛。相思此地今如許。萬里重迴且息機。

次韻仲章過彭城

山影涵青蔌蔌來。周遭城角漸低回。梁分曲直雙龍下。水合縱橫萬馬迴。鑄冶已銷游子俠。登樓誰負謫仙才。淒涼正字寒如許。萬疊蒼雲鎖翠苔。

仲章詩律大進。數日道中論詩亦頗相合。復次前韻以勉之。

氣摩屈賈欲平揮。格律論詩要有歸。石髓定成千歲乳。藕絲空綴五銖衣。寒原草盡蒼鷹攫。涼月松陰白鶴飛。從此窮河天已近。還家何用詫支機。

仲章詩律已入唐人風調。而下語猶未馴妥。殆類禪人過橋斷橋之意。近世學者類有此失。仲章德業遠大。當不若是。此殆其弄翰也。次韻。

落落懸河巧發揮。盤渦洄洑竟東歸。苦心欲寄千年簡。妙語誰傳半夜衣。野馬功名甘卻走。雕蟲翰墨愧橫飛。多言要是平生累。瞪目相忘杜德機。  
玉色橫陳羽扇揮。江湖邂逅似忘歸。終憐古調難爲瑟。誰信天香不染衣。汀草弄妍成背怨。山雞照影惜分飛。鮫人雨夜珠成滴。清曉知裁第幾機。

平生俗客手曾揮。愛子清新欲倦歸。北闕正鳴蒼玉佩。南湖空製芰荷衣。麒麟瑞世非關走。鷓鴣呈空不爲飛。薄宦政須成吏隱。莫將奔逐墮危機。

舟行將次淮南。行復敘別。而仲章歸程可還家作端午。次韻述情。

曾憶登舟送客揮。艱難何事獨南歸。楚鄉水暖沈菰黍。江國雲深潤葛衣。坡筍綠迎馴鹿過。海榴紅駐小鶯飛。笑顏已極誰爲語。絕倒無嫌似陸機。

中秋次韻貴白

桂子香飄露濕巾。廣寒疑使月爲賓。流螢不受十分采。過鴈真成一點塵。吹徹梅花天外思。飲殘竹葉夢中身。靈河自有乘槎便。擬轉神山閱爛銀。

寄王參議

輞川新樹綠勻勻。睡起慵軒岸葛巾。穿石養魚迴小隱。盈缸釀秫補長春。胸藏醫國三年艾。天傳與家一角麟。蒼狗白雲今已定。不應談笑卷經綸。

玉堂文杏合歡枝。共說仙翁賦有詩。日暮團團空翡翠。雨寒點點自燕脂。塗鴉舊詔追遺事。揮麈清談補雅詞。千古襟期誰與共。相親那得勝相思。

泊支家口望瓠山僅一舍復寄

天平水闊鴈參差。下有高人坐不移。懸榻定知延孺子。汎舟無奈似微之。晴雲滿塢開新畫。落月穿梁想

令姿眼底憐才誰復近。裏糧端擬話心期。

次韻應德茂寒食見懷

寒食光陰君莫游。亂花羞別古枝頭。山家蠶浴雨穿屋。海步魚腥浪蹴舟。楊柳飛時疑是老。杜鵑啼處不緣愁。詩來未盡相思意。刁斗寒清月過樓。

次韻史猷父春游夜歸

留取餘春伴白頭。落花如雪翠如流。提壺不用頻沽酒。垂柳偏能獨繫舟。過雨月開雲母障。隔湖燈映水晶毬。還家已覺衣裳冷。遙聽鐘聲是竹洲。

戲贈黃仲正

好花不受丹青鑄。碧眼難將白黑分。萬里宛駒出龍種。十年野鶴異雞羣。知卿未盡才難數。酌我毋多酒易醺。午夜池塘有新夢。好將色筆寫春雲。

再用韻答仲正

愛子十年燈火勤。相看不惜錦機分。飛花映水空憐色。去鴈出雲終念羣。一寸春霏生遠思。五更清夢了殘醺。詩來陡覺秋濤衰。海嶼青飛片片雲。

泊彭城復懷黃樓

黃樓高下復誰識。白塔短長應得知。萬里風煙歸傑作。百年雨露起深思。文章自昔爲時忌。翰墨于今作

世師從此江湖掩篷去。碧雲斜日數游絲。

泗水

泗水青於古蔚藍。因依碧藻淨相涵。遊魚細數心空羨。活火新烹舌自甘。可怪然犀望牛渚。底煩斬虎觸蛟潭。清湍混混歸滄海。不惜臨流浣舊衫。

歌風臺

長安蘓醜恣猖狂。頭白翻思守四方。不悟宮中有呂氏。卻憂身後有吳王。老翁後嗣真癡弱。遊子故鄉空慨慷。千古英雄多此意。荒臺清淺水微茫。

清明

水落渾黃風晦冥。不知節物是清明。道旁新塚悲歡盡。柳下長亭聚散輕。門靜鞦韆歸燕逐。沙寒筇笠過魚驚。河南禁酒河陽飲。醉醒相看總有情。

宜遠樓

紫翠光中擁翠鬟。分明倒影落西山。遊塵自逐鐘聲去。過雨能將月色還。萬里關河新勝概。一天星斗舊躋攀。絕憐想像空題詠。後會應須共倚闌。

李學士畫壁初成席上分韻得毫字

春樹纖穠隱碧桃。秋山磊落湧銀濤。天邊雨露歸青障。物外煙霞入素毫。有客支筇臨水徑。何人解珮憶



蘭草滄洲景物供題品。準擬淋漓奪錦袍。

次韻危公道道士壘塘族孫與予爲年家

筆勢翩翩千丈坡。一天清遠佩飛霞。金莖欲採珠宮露。鐵箭能敲玉壁砂。人物滄洲憐我輩。冰霜喬木擅君家。百年此意知誰會。相視無言眼倍花。閉門積雪擁平坡。誰把餘醺散綺霞。掛瀑觸裁天外練。熬波竟化海中砂。機心著物那成語。句眼論詩合到家。從此相親勝相望。不妨渴墨醉成花。

再次韻

家世清聲起諫坡。江湖邂逅忽披霞。新姿正似三眠柳。妙語能爲九轉砂。杯寫黃封來禁道。窗留白醉近仙家。慙慙懸榻何時下。準擬寒空詠雪花。朱顏冰雪映瑤坡。清曉朝陽漱碧霞。神目豈堪容玉屑。聖胎端可化金砂。碧桃有實誰爲種。玄鶴無心莫問家。可怪春風滿詞筆。硯池頻與滌冰花。

游城南次韻陳玉峰

市橋水斷綠交加。蒺騎險尋處士家。坐聽蟲聲行木葉。臥看雲影落簷花。清晨采露筠籠重。薄暮沾春烏帽斜。一徑寒英端手種。好烹晴綠代煎茶。

送真定任生

東髮從戎天外萍。還家何事說飄零。花前秉燭頭疑黑。馬上看書眼倍青。倚劍獨憐今古月。吹笳時憶短長亭。故人烏府頻相問。一笑惟尋雙玉瓶。

次韻史允叟殘菊

白鴈西風幾夕陽。故園牢落是它鄉。獨憐壽客三秋晚。不受玄神一夜霜。曉沐綏垂蒼玉珮。晚粧愁帶紫羅囊。凝香深院誰消得。時許飛瓊點額黃。

次韻元復初簡危公遠

客舍光陰幾驛亭。天邊白日轉重溟。擬將竹葉留春住。共慰杏花隨雨零。鶯入上林貪翠萼。鶴旋華頂傲青冥。十年道舊元文學。爲笑無心似水萍。

蔡逢原編脩婦翁壽八十

堂堂經學古儒風。三世相傳八十翁。靈壽杖扶雲兩屐。延年水飲月雙瞳。閒逢好客猶花下。倦憶前朝似夢中。閭社從今誇盛集。重行彩袖舞杯空。

次韻陳無我題石窗故居

煙雨歸來別有春。支頤曾作笑雲人。還家未信三千里。拂石今看第幾塵。往事黃梁方就枕。多情白髮竟沾巾。故園未覺秋容淡。留取孤香次第新。

夜別俞生

半秋歸夢常縈繞。三十六雷煙樹重。所居山名台人謂山高處爲雷。欲別祇看今夜月。無眠更聽五更鍾。青帘出市橋邊路。白雁連天海上峯。聞道還家有新樂。不妨雲榻臥高春。

次韻正旦會朝

闐闐春迴旭日鮮。花光搖曳瓊僊僊。金蓮漏下催初刻。玉筍班齊祝萬年。香擁袞龍開黼坐。風迴笙鶴舞鈞天。朝元法曲誰傳得。歸醉蓬萊話日邊。

送山人還江南

白雁南來愛朔風。掉頭我亦一枝筇。澄江去浪疑奔馬。古洞歸雲似伏龍。釣石水移黃葉滿。丹爐煙冷碧苔封。從今不說人間事。更上崑崙第幾重。

次韻田師孟詠牡丹

積翠瑤京玉作層。笑餐承露議誰勝。腰寬似稱黃金重。心巧終憐刻楮能。蜀客錦機流水浣。茅仙丹鼎彩雲騰。道人香色都忘卻。月落空闌始一凭。交枝風動碧層層。揮手芳塵謝不勝。解帶暮雲真韻勝。斂襟午日是驕能。取青媲白憐雕鏤。抱紫迴黃合變騰。宮錦競傳新拾得。沈香亭檻喚誰凭。紫府淵淵十二層。濃春如酒力初勝。苦心似怨鮫綃薄。敏手難誇羯鼓能。雨立無言慙委靡。地行何術可超騰。雲窗烏几誰消得。時許飛瓊月下凭。

次韻師孟西曹卽事兼簡子貞儀曹二首

時議定  
律令

盛世昭明復古初。掃除弊事獨溫舒。牛毛置令心徒褊。鳥跡遺文禮本疎。齊相避堂憐獄市。鄭人鑄鼎泣刑書。畫簾一度薰風曲。欲寫琴心愧不如。

蕭疎門巷落花初。楊柳陰中指望舒。辨拙莫窮三耳妄。塵深坐見二毛疎。覆蕉得鹿非真夢。點筆成蠅豈誤書。慷慨聽君人物論。雕蟲我亦陋相如。

次韻贈峨眉侯道士築宮江陵

白苧藤冠自在身。獨看潭影認清真。還丹已化千年雪。玩易重尋太古春。楚觀江流通白帝。蜀山雲氣接青神。冥鴻南北疑無跡。萬里乘風問世人。

次韻陳貴白中秋見懷

玉人海上振衣來。一曲清商鐵笛裁。碎露晶瑩疑水立。橫雲缺落似山頽。卯君端有鎔銀術。西帝慙無斫桂才。往歲相思江北路。夜闌曾上望鄉臺。

次韻鄭景尹詠梅十首

笑壓羣芳雪霽吟。點糖詞筆補春林。衝風曳白疑含笑。映日抽黃轉苦心。鐵石橫陳羣羽避。冰霜獨立二毛深。阿戎故是調羹種。可爲閒情淚滿襟。

醉倚孤根散髮吟。他年鼎鼐出園林。黃鬚雅相非凡種。白面清談豈素心。湖月歌殘銀燭冷。湘雲弄罷玉

龍深。疎明可是無春思。角曉霜清整翠襟。  
幽人爲愛水邊吟。雪滿疎籬。月滿林。魂冷不知莊叟化。神清難撓楚王心。寒蜂戀蜜須猶綴。霜蟬含漿色  
轉深。千古湘纍詎無意。廣騷從此酌靈襟。  
手題色筆朗飛吟。雲佩衝寒入寶林。雅操獨高淹海角。微陽初動識天心。鏤冰嘗巧機猶淺。切玉疑神用  
始深。回首羣芳半蠹俗。倚風三嗅爲開襟。  
回首白頭悲故吟。清愁萬疊起雲林。東君密注非無意。北客相逢訝有心。絳闕雲低珠藥迸。碧潭風定玉  
微深。色香要是人間世。更上凌虛始散襟。  
萬里相逢得放吟。醉揩雙目傲瓊林。龍沙慘澹明妃怨。漁笛淒清處士心。餐玉似嫌玄甫冷。笑雲應善翠  
微深。何人更作江南句。翻使兒曹競挽襟。  
欲看南雪倚簷吟。點檢春風第一林。天與陽和誰借力。晚持精白轉虛心。冰蠶半蛻眉猶溼。凍蠟初銷淚  
漸深。夜半花神應有語。覆觴從此斷裀襟。  
梳風帶雨爲渠吟。揮手唐昌陋鶴林。壯髮初生齊映額。童顏已就靜齋心。野蠶成繭輪困富。玉兔抽毫刻  
畫深。莫遣風姨強攘袂。故教月姊與聯襟。  
十分深酌十分吟。烏帽枝筇故繞林。月下無言疑背面。水邊獨立似傷心。珠成蠟鳳王郎巧。笙徹青鸞帝  
子深。歲晚自知誰與伴。風篁搖影互交襟。

參殘霜急尙孤吟。恍恍神游古躡林。四皓局殘惟一色。三郎鼓罷了無心。珠游鐵網青琅潤。苔補虬枝壞  
衲深。擬把鸞膠固青蔕。未須殘雪墮衣襟。

贈潘山人

夢中得前二句。因續之。

布襪青鞋今已矣。看山舊眼碧深深。空憐石馬駐荒塚。不見金魚飛翠岑。地鏡有書穿石乳。土圭何術候  
天心。行年七十足稱老。牛臥前坡爲指尋。

次韻景尹醅醢二首

光陰風雨短長亭。花到春餘倍有情。翠蔓倚松超直幹。錦江緣酒錫嘉名。蛻蛟纏影青雲聳。么鳳啼方新  
雨輕。白面郎君休翦綵。好將椽筆賦西京。  
不將名字博西涼。留取餘春在一觴。當展珠衣迎面立。曲房寶罨捧心裝。碧雲一色行明月。翠幄千層護  
夕陽。揮手朱殷空爛漫。敢將清思富幽風。

可久齋二首

虛室心源百尺澄。深深龜息養空清。一川鷗鷺古儀表。四海弟兄真性情。璧玉誰人傳至璞。鏞鍾何處問  
希聲。芒鞋直訪茗溪上。雪透梅枝鬪月明。  
三十六宮春不老。何人月窟重推陳。亭亭倚蓋浮空碧。匝匝空輪颺素塵。郢客詞工端自苦。海翁機息可  
相親。支頤擬問庖犧易。笑指靈蓍似有神。

送長洲江都史

官曹無事日提壺。一榻深明晝倚梧。稻蟹水低歌拍拍。尊醴秋冷夢蘧蘧。長年簿領慚錐子。晚歲生涯羨木奴。千里布帆歸思好。雁聲伊軋起菰蒲。

昌上人游京師。欲言禪林弊事。甫入國門。若使之去者。昌余里人。幼歲留吳。東郡遺老及穎秀自異者。多處其地。以余所識聞。若承天了。天平恩。穹隆林。開元茂。皆可依止。遂各一詩以問訊。虎丘永從游。尤久。聞其謝世。末爲一章以悼。

人說江湖少舊僧。懸崖深掛一枝藤。採苓欲取千年魄。擊石曾烹六月冰。天上星辰端歷歷。胸中樓閣自層層。相逢上說前朝事。知是松源第四燈。

青鞋高掛天平壁。指點雲門三兩峯。禪榻已容黃葉覆。詩瓢從把碧苔封。曉風殘月千村檣。細雨疎煙隔水春。我向京城疑老盡。吳山清淺越山濃。

獨木山寮不出門。一瓶一鉢送朝昏。巖迷鳥跡千崖泣。松吼龍吟萬壑奔。掩息端如雞抱子。愛閒屢見竹生孫。海門月落寒潮急。準擬乘槎與共論。

玉几峯頭第一枝。老禪吃吃我深知。曾將鐵杵敲冰骨。似怪鉛刀割密脾。法外無心猶涉解。句中有眼卽成疑。袈裟不展蒲團穩。此是開元妙擔持。

就識虎丘三十年。精神霄漢鶴張拳。機當危處卽燒印。語到盡時難續絃。路涉兩岐空有泣。溪流一滴竟

無傳。雙峯古樹蒼藤。霄時有子規啼徹天。

手調千歲廣寒藥。擬補月輪蟾已飛。眼見昔人歸逝水。心憐志士惜殘暉。孤花苦別生香樹。急雪深憐壞色衣。爲愛同鄉復同客。絕慙同調不同歸。

山人歸去意何如。八尺方牀自卷舒。側岸採茶敲石火。隔峯翦竹溜清渠。碧潭印月菱花鏡。白雁橫空貝葉書。後日相尋定何處。不於吳下卽康廬。

次韻王繼學

蕭蕭寒雀下庭除。一榻蘧蔭是我居。雪後看山雙眼淨。風前攬鏡二毛疎。退之掌制慙存藁。退之四十八年僅存崔羣戶部一制。余年相同亦草一制。伯玉知非定止車。深愧年華增老大。還家早注故山書。

除夜雪

黃雲黯淡夜如何。晚勢參差更駁。著地不隨人跡亂。舞空偏入麥苗多。雅驚列炬穿珠樹。馬趁初朝映玉珂。歲律詎隨人事改。故將嚴冷轉陽和。

元日朝迴

積素樓層厚載坤。天雞三唱日初暾。千官山立歸文石。六衛嵩呼徹禁門。花帽舞風喧法曲。椒觴承露湛皇恩。新年欲奉瑤池對。願借扶搖與化鯤。

萬國梯航滿禁衢。卉裳象譯語音殊。鳳簫聲送織腰舞。雉扇行分兩翼趨。花氣欲浮金鑿落。雲光疑下錦



沈蘇詞臣不識金泥祕。指點薇垣頌六符。

偶述末章答繼學


承明三入並時流。俯仰深慙此地游。誰謂東南無美箭。極知西北有高樓。韋編舊學陰陽祕。汗簡功深歲月修。三史如山詩思少。那能走馬過長楸。金鑾深處是家氈。玉雪青春不負賢。會見鳳毛能掌制。定知麟角可膠弦。浮榮芻狗寧居後。曲學雕蟲敢避先。慙愧南州徐孺子。每看塵榻屢潸然。

雪後

畫角初消已弄晴。曉看突兀眼偏明。寒窗駐景成虛白。凍樹裁春點素瓊。北戶埋藏疑有跡。南枝搖曳若爲情。憑君欲問飛雲巧。水自白雲山自橫。

送李署丞歸許下

春風得意故還鄉。月白霜清傍晚裝。燕領定承新鳳詔。馬蹄猶戀舊鷄行。溪邊父老欣相過。燈下兒童訝已長。我亦辭家經一載。青天歸雁攪離腸。



# 清容居士集卷第十二

律詩

七言

送喻道士歸蜀

舊與內相字公爲布衣交。

鶴骨輕輕碧眼鮮。五千言裏契重玄。定知德裕曾傳道。久與長源共學仙。金籙夜調丹井汞。紫衣春染御爐煙。掉頭不說人間事。指點白雲尋醉眠。

趙郡睦孝子真逸堂

青松手植已成雲。盡日庵廬不出門。屋角慈烏議晴雨。階前馴鹿候晨昏。清秋釀黍脩鄉約。深夜篝燈課魯論。明世詎堪成隱癖。舉頭束帛起丘園。

五老堂

鬢眉雪色古儀容。五老雍雍氣象同。菊水定知延上壽。桃源今解識高風。弟兄黃卷傳儒素。娣姒青燈教女紅。慣說前朝征戰事。醉拖筇竹數歸鴻。

送河中段惟德應奉除西臺御史

千年青簡正紛如。還著鐵冠歸故居。妙筆醉欺紅芍藥。丰姿鮮開玉芙蓉。過家上塚爭驚喜。拄笏看山任卷舒。試上樂遊原上望。綠陰芳草正扶疎。

韓參議家慶圖叔祖暨父各九十。

丹泉爲醴菊爲菹的的厖眉似畫圖。萬石齒高勤澣洗。二疏年並得歡娛。兵前父老難尋伴。眼底孫曾總業儒。欲向碧桃花下醉。斑衣紫綬兩相扶。

吳成季父母壽八十

延陵季子古高賢。雲耳于今壽種傳。有道定知真有子。齊眉更喜復齊年。蒼龍雙擁宮膠湛。白鶴重歸丹井鮮。自是君家多孝感。玉杯甘露會羣仙。吳猛事父母至孝。後有玉杯甘露之感。

白雲平章致仕

曉看明鏡欲休休。萬里功名陋虎頭。絳闕直辭黃鵠貴。白雲終伴赤松游。侍臣傳醴真殊遇。退傅揮金得自由。盛代東封催告禮。更須元老侍垂旒。

寄題成都李御史萬竹亭

亭亭萬竹封侯貴。聞說西州植此人。風送笙竽聯雅奏。月留鸞鶴寫清真。山頭密護千年雪。地脈潛行八月春。舊謂言竹鞭八月四行。欲上岷峨探游事。煩君指點浣花津。

送鄧君用教授歸廣信山

光陰那俟日懸車。拋卻荷衣卽故吾。置對直如朱伯厚。退休還似邵堯夫。白鷗遠水清秋鏡。紅葉前峯落照圖。耆舊卽今同逝水。早將鴻筆爲傳模。以謝疊山黨下賦。

壽李承旨二首

兩曜迎陽合璧時。卯君乘瑞佐昌期。閣中像有功臣贊。圯上書爲帝者師。碧眼閱人如水鑑。丹心許國有天知。歲周甲子今重轉。消息梅花第一枝。清時得意恣逍遙。雪色鬚眉兩鬢饒。棊局春風深閉戶。酒樽涼月獨吹簫。豹韜袖手終傳采。鳩杖無心強造朝。門外種松今百尺。它年爲我掛山瓢。

安西老人

方瞳如漆耳輪高。喜見曾孫守碧桃。鳩杖月明尋枸杞。鳳簫春暖醉蒲萄。故人天上方蟬冕。老子山中但豹韜。欲問汝南耆舊事。且乘龜殼把雙螯。

早朝興聖宮次韻

萬馬東西甬路斜。銀河初曙起宮鴉。天香隨輦凝三素。風絮沾袍點六花。銅史漏浮催卓午。玉奴聲轉進流霞。詞臣點綴瑤池事。底用秋風海上查。

次韻周南翁退朝三首

蹕道聲迴覲后皇。霞旌雙引拂朱光。龜臺新按霓裳曲。獸鼎重然甲煎香。歌板遏雲穿泱泱。酒車流水度汪洋。重輪瑞世思齊聖。傳信應須屬子長。

雉尾高張擁玉皇。彤庭金榜粲明光。舞階飛絮傳滕六。執術傳臚轉阿香。珠帽簫聲雙窈窕。翠旌雲影互

方洋侍臣誰近前。竊立願紀堯年化日長。  
峨眉斑立肅皇皇。恰匝松陰陋午光。舞詔當軒初進酒。表函登陛促傳香。六龍捧御雲中日。三象輸琛嶺外洋。欲識兩宮清淨理。薰風殿閣漏初長。

和游岡子原韻

棠花淡淡柳花濃。岡子原頭立晚風。三月雨聲人共喜。一樽春色我難同。麒麟臥草青山外。驛驪穿雲綠樹中。晚歲滄江情不盡。想看清淺數鳧翁。

用早朝韻酬伯生試院見懷

玉署松深月半斜。研朱和露勘塗鴉。射熊心苦穿楊葉。吐鳳聲清飽竹花。過眼似迷三里霧。騰身誰上九層霞。故人掉首南山去。應釣秋風漢水槎。

酬周南翁子二首

小榻燈殘雁影斜。詩成重點墨如鴉。臯禽警露呈三疊。天馬追風翦五花。郢客有才歌白雪。湘纍無計佩飛霞。璿源自是天邊路。不用羸糧學泛槎。  
碧篔簹長短鬪車斜。玉雪青春髻似雅。博物已知窮海衆。苦心端欲鑿冰花。山中伐木鳴搏黍。馬上看塵起落霞。健羨雲窗無限好。慈烏雅雅鵲槎槎。

送儒醫何大方歸信州

雙槽鵝鳴野水高。天風落葉響林臯。空堂桂露流金乳。舊鼎鉛霜長玉膏。丹府久虛存夜氣。上池新飲察秋毫。山中猿鶴驚相問。肯爲緇塵染素袍。

次韻周南翁拜孔林二首

陵廟陰森佳氣蟠。湯湯洙泗接淵源。硯傳昔日王官得。履憶當年漢庫存。手板文裁楷舊植。髮冠香守檜

殘根。

唐文皇以孔林楷木栽手板。賜十八學士。鄉中張參政家猶存。金亡。檜焚。士大夫斷檜根爲髡髮冠。

羣經日月行天地。萬古章紳沐聖恩。

山蒨平林野水清。整冠下馬得徐行。壇空尙憶風雩樂。宅近惟聞金石聲。環珮齊趨文有度。豆籩初秩禮爲程。百年雨露同車軌。郡國千官奠帛生。

贈豫章蔡黻歸里

以鄉舉不中來京師。

抵掌彈冠謝未能。立談白壁且擔簦。厭聽長衢三尺雨。愁飲深冬半片冰。冠蓋情傾年運往。簡編心苦歲華增。去來聞見冥鴻迹。岸幘雲峯撫大鵬。

次韻院長題趙崇德脩撰玉簪集

誦君家世倚樓句。不似玉簪留詠深。鳳隨獨傳天外寶。裏蹄端出水中金。停盃蘸甲難陪和。對鏡搔頭敢擬尋。可是因花攪情思。相君題品的知音。

送朱本初住玉隆萬壽宮

聲華文采動公卿。忽綰烏條出帝城。眯目簿書空汗漫。飛空樓閣正崢嶸。浮雲變態西山盡。往事灰心北

斗鷲肯作蕉池談笑住。瑤壇笙鶴夜深清。

寄城南友人

三入承明願已酬。蓬瀛又復接清流。碧牋時寫飛花恨。寶瑟曾傳細雨愁。夢繞故園追過雁。眼穿鄉樹認歸舟。荼蘼落盡啼鶻急。慙愧羣公得縱游。

寄史允叟

故國王孫佩碧蘭。春雲涼月倚朱欄。玉簫曲趁鶯聲轉。金鼎香隨蝶夢殘。碧沚波清堪把釣。黃塵風急倦彈冠。外家文采唯君在。笑我冰髭跨曉鞍。

寄陳文卿

窗對平湖柳對門。隔鄰鐘磬送昏昕。水煎菊本傳家舊。酷壓桃花勸客醺。擬向蠻溪誇鑿鑠。爭如月窟養細縑。通家欲說先賢事。兩岸書燈點點分。

寄蔣遠靜

金紫家氈五百年。城南喬木儼蒼然。久知華屋慙卿長。肯向深盃品聖賢。盧白衣窗刊墨譜。硬黃冰硯補瓊篇。年開六袞未云老。桂斧重脩月定圓。

寄鄭景尹

太傅東山臥白雲。經緯勤拾付諸孫。玉堂舊制毫芒見。黃闕深功百一存。舊見中興玉堂裏。唯傳位詔一篇。金盃宅深春



雨暗烏衣巷。靜夜潮喧。佳花奇竹。勤題品。莫學儒酸老瓦盆。

寄開元恩禪師

恩公遯跡闔門寺。欲下繩牀謝不能。露滴花光珠五采。月涵江影塔千層。石榴紅帽明如火。海艾青氈冷似冰。俛首西山人物論。獨聽孤雁對殘燈。

寄本中峯

天目峯前萬石蹲。坐看晴晝白雲昏。山河有象百神泣。鍾磬無聲兩足尊。古澗老猿啼子母。荒林野葛斷兒孫。空王法藏誰傳得。不展袈裟不出門。

題郝伯常雁足詩

深羈孤館鬢毛斑。猛虎搖鬚障海寰。玉樹已歌歸逝水。羽書難射隔平山。不須羝乳終回漢。肯學雞鳴詐度關。一寸蠟丸憑雁寄。明年春盡竟生還。乙亥四月放還。

霜落風高。恣所如。歸期回首。是春初。上林天子。援弓繳。窮海粟臣。有帛書。中統十五年九月一日。放雁獲者勿殺。國信大使郝經。書于鳳州。忠勇軍營新館。中統十一年。明年奉使還。

送王景先赴燕南僉事

一疏朝天罷柄臣。河南并邑萬花新。繡衣暫著明銀漢。青鎖初辭戀紫宸。朝膳平反娛壽母。露困直指活飢民。清時經濟須公等。佇見鋒車入覲頻。

小院四月十二月牡丹始開。乃單臺花也。余將上開平。作詩示瑾。

暖風吹雨佐花開。送我灤陽第四迴。內苑賜會傳側帶。舊賞花宴有大側帶。小側帶。江南畫不數重臺。徐熙牡丹無重瓣者。至崇嗣始

有之。重臺。婢之下者。見常談云耳。迴黃抱紫傳真訣。媿白抽青陋小才。自是妖紅居第一。它年折桂莫驚猜。韓魏公牡丹詩。自翫折桂

輸先手。蓋殺妖紅作狀元。魏公第三。王堯臣第一。

初夏即事

斜暉庭院樹陰移。翠蔓交加靜對宜。幸有花王能引酒。慙無草聖助題詩。雁隨雲影還鄉近。燕惜春光築壘遲。蓴滿東湖嘗不得。笑看羊酪寫相思。

壽椿堂爲王正巨作。

嘉樹婆娑十畝勻。笑扶靈壽日千巡。風迴空籟笙竽轉。雪壓長柯鐵石新。欲從六龍遮赫日。佇看五鳳舞長春。銖衣拂石方成劫。似笑莊生說未真。

送湖廣萬戶

壯歲軒騰碧海鯤。英姿玉立映朝暉。昔司魚鱗曾通籍。今佩麟符暫偃藩。渚對紅蓮便羽扇。岸臨朱橘傲清尊。鄂宮疑在平蕪際。爲淪蘭湯些楚魂。

次韻宋誠夫二首

風雨寒簷雞報晨。書聲盡歲徹比鄰。食貧不作三千客。射策端爲第一人。吳郡壯游追子美。楚宮陳迹醉

春申少年覽歷真奇絕。似勝宣尼厄在陳。  
蹇驢入局走寅晨。落月相隨擬結鄰。鴻蹟鉅樞倖古帝。虬髯英貌想天人。亥書深恐經三寫。乙令何妨著五申。明世經綸須國士。它年宣室願前陳。

高內宰母漁陽郡夫人李氏表門

高門槐柳綠陰勻。鶴髮浮光釘坐新。繡出人間金孔雀。孕成天上玉麒麟。萱花北戶丹心爛。竹葉初筵素臉真。曾向瑤池侍清籟。碧桃傳種六千春。

壽劉彥良宜慰母夫人九十五

英英壽母步蹠躄。疑是瑤臺墮地仙。眼見九朝全盛事。身經三世有餘年。百壹傳賜黃封溼。束帛如恩繡段鮮。指點斑衣聽訓語。清忠報國紹家氈。

送湛師校經回杭

寒峯雲聳翠霏凝。整著青鞋侍帝庭。貝葉頻刊塵凡淨。天花新墜寶臺馨。兩翻荷露閒鷗立。風攬松濤睡鶴醒。絕世樞機真止水。從今掩息畫堂扃。

送雪竇長老校經回里

翠鎖松關疊疊高。坐看明月負金鼇。已將禪板傳心印。暫下繩床披毳袍。聖諦無聲機獨露。經筵有誤目難逃。塵中白髮誰消得。歸掩山寮聽雪濤。

送董教授之淮南主簿寫上都教  
授多善教

五月寒深冰滿鬢。碧天雲冷竟何如。聽駝度磧心彌折。隨雁還家計未疎。禮殿競傳周篋篋。論堂新整魯詩書。明年又作淮南客。蘆荻叢深看捕魚。

寄上都子貞伯庸繼學三學士

侍臣親切見銀河。不用虛無八月槎。蟬報早秋歸木末。龍拖殘雪度山阿。琵琶雲冷相思切。蹀躞泥深獨立多。今歲同行詩墨壯。飛觥擊鉢正橫戈。

遠客三年親友簡。絕獨開元鄰僧。以書茗相寄。

廿載神京汗漫游。玉堂深處得無愁。隨龍北上迷三伏。送雁南歸憶九秋。親友共嫌疏問信。律師屢約勸歸休。南湖出日西湖月。應許明年共泛舟。

進史明仁殿書事

大帝仁功徧八寰。敢將鉛筆強脩刪。寶輿花覆簫聲趁。黃道松分佩影環。仗瀕金吾開雉尾。香浮黼坐仰龍顏。還家陡覺詞臣貴。獨恨年深鬢已斑。

寄開元奎律師

雙塔亭亭透夕陽。芭蕉深處碧窗涼。江神夜聽光明偈。天女朝分解脫香。齋鉢午空烏守樹。經臺雲冷鶴歸房。平生欲結西方社。似怪淵明作吏忙。

伯庸開平書事次韻七首

沈沈樓殿內門西。曲宴名王舞馬低。桂蠹除煩來五嶺。冰蠶卻暑貢三齊。金罍醅重凝花露。翠釜膏浮透  
杏泥。最愛禁城千樹柳。歸鴉揀盡不曾棲。  
尙方新製玉東西。一曲生香舞袖低。閨苑春濃巾角溼。巫山雲冷帽簷齊。前行按曲停檀板。內直催宣印  
紫泥。可是年深慵應詔。道人自愛碧山栖。  
身如病鶴倦梳翎。往事猶存舊汗青。伏日賜冰來上苑。晚風傳竹度疎櫺。承恩裁詔心抽繭。落筆誅姦眼  
拔釘。惆悵當今人物論。披衣危坐望晨星。  
客子光陰疾箭翎。徘徊玉署愧紆青。當塔翠影翻紅藥。連瑣回紋認綠櫺。賦擬卿雲羞札蕙。文追班馬黜  
灰釘。北門英彥珪璋重。朝論詮量比秤星。  
的的新愁漲碧波。可堪跋馬上危坡。明知風伯秋當路。更候天孫夜度河。沙磧共傳歌敕勒。陰山那復見  
延陀。周廷王會須椽筆。慙愧陳人奈老何。  
馬足曾窮五色河。更將舌本品浮槎。新聲促軫傳三疊。寶構懸鈴鎮四阿。短榻雁來愁不奈。小窗人去酌  
毋多。白頭慵作東封頌。願效諸生賦止戈。  
侍臣底用賦明河。西海曾看貫月槎。向矣伏蒲移塞外。終然加壁耀山阿。羨君一鷁孤難並。愧我雙鳧數  
似多。舊讀韜鈴工七縱。裹瘡從此願投戈。

送梅叔章官東流簿

江水東流八百里。縣市南遷五十家。寒蘆捲風散晴雪。野燐照川成暮霞。眼看平楚堪舉酒。睡足高春方打衙。都官之孫詩有種。玉板日給飛龍蛇。

次韻景尹觀菊

輪郭團團漢五銖。身輕疑食碧雲腴。翠蕤建纛煙凝紫。金粟搔頭露迸珠。初日正宜催玉立。清霜那使作銀鋪。城南兄弟空相憶。插盡黃花更插萸。

託根不復辨殊方。朵朵參差列雁行。曠日巧心端補袞。迎霜生面似含香。飛英獨佩疑湘浦。笑靨初鈿陋壽陽。惆悵千林正寥落。故將清冷闢秋光。

送杜輝卿源蜀

浣花溪上水粼粼。化治能爲五色春。奇錦鶯穿金綉縵。粉箋花印玉精神。百年文物毛錐舊。萬里車書馬足新。仁壽堂前乾鵲喜。綵衣歌舞動比鄰。

送石上人還江西

圓帽方袍入帝都。秋風惘惘意何如。雪飛北口蘆花絮。雁落南空貝葉書。聞見迴忘雙屐履。行藏無住一纏藤。南泉安衆千五百。從此跏趺滅太虛。

送李巖夫四川詳史

玉雪精神映彩霞。清秋馳坂忽還家。心聲珠貫通三象。目力機深洞五紮。青簡世傳端合繼。黑頭早貴實堪誇。子雲猶有江邊宅。好續方言振國華。

紀生書經罷歸還里

烏帽櫻鞋四十程。北懷鵬翼決南溟。定須金匱題銀管。不羨鴻都寫石經。落葉行堦疑急霰。流螢穿樹似疎星。白頭病客思歸切。欲別無言酒易醒。

示臯甫生

矻矻窮年臯甫生。眼矐如漆映書明。神清古鑑金莖露。佩雜寒英玉井瑣。賜谷久知螢爝陋。丹山深愛鳳雛清。玉堂老叟端歸去。龍榜蜚聲遲子成。

再送紀生

荆國書臺有紀生。眼穿紙背倍分明。聲音雜比昭華琯。跬步周旋夏后璜。賦律意深慙篆刻。詞華情近忌輕清。老來贈語多謬誤。歲晚相期玉汝成。

鄉友南歸客舍淒然再次韻

雙槩迴波沒復生。人隨帆影去邊明。愁雲亂疊敷重席。寒月初弦掛半瑣。漁泊汶橋煙樹暝。賈團淮浦海潮清。方牀獨坐愁無著。萬籟笙竽奏九成。

睡覺東西書燈猶明喜勉元達兼示瑾子

兩家聞見參臺閣。諸老論思聳廟堂。莫畏大名辭繼紹。願超凡子脫輕揚。文章正始師先漢。格律黃初謝晚唐。師友淵源端有緒。老夫推枕起論量。

省中議事回元達有詩次韻

烏帽黃塵久帝城。紫薇深處得陪行。擬將直筆酬延閣。欲抱遺經進邇英。老去病多傳桂酒。秋來情重憶蓴羹。蕭蕭易水聲悲壯。不盡襟期白髮生。

馬伯庸以詩餽兔次韻

閉門滕六散銀星。對坐罽毼白玉屏。琴匣冷光棲綠綺。壁騰寒燄起青萍。凍雲縹緲迷圓嶠。小酌無何入大庭。知我年來雙眼眊。特分明視了殘經。

十一月十四日駕至京城楊仲禮有詩次韻

金輿清蹕發龍城。乾雪坡陀甬道晴。師起晉陽戈盡倒。令傳代邸轡徐行。鸞皇合奏雲光退。龍虎交章曙色明。欲認雞翹新法從。駝車深處聽鈴聲。

題馬氏先塋記後

曹子貞求作。自崇寧傳至今。

衣冠異代劫灰平。眼見佳城歷變更。曲水護田成委佩。織峯當戶似疑兵。玉蠶零落威王塚。石馬縱橫晁氏塋。盛德獨傳三百載。好將遺事述新銘。

甲子立春



泰定元年新甲子。天門上聖啓瑤圖。日融凍樹青煙葦。土坼晴蔬碧雪鋪。五鳳彩樓催羯鼓。雙龍絳闕勘魚符。侍臣廿載題春帖。從此歸休拾澗蒲。

瑾次韻復成爲隱居計

京塵二紀楊蘧條。近喜家兒報宅圖。移石近堂雲亂擁。栽梅當徑蘚重鋪。留春定合箋花譜。品水應須置竹符。鼎鼎南山看積雪。青青古澗玩新蒲。

病中玩易復次韻

丙寅老人五十九。猶是先天第二圖。桃竹杖輕藤杖換。蘆花絮冷柳花鋪。當陽山立隨羲御。後夜尸居奪晉符。已識羲皇真太極。不須黃獨與蒼蒲。

三次韻

濟勝閒身倩給扶。家林應許畫爲圖。空巖有象飛泉舞。古徑無蹤落葉鋪。壯歲思仙尋火記。暮年制氣習陰符。松花一七能消得。猶憶南州筍及蒲。

武氏母八十

玄髮離離聳黑鷗。桑田滄海事如麻。魚穿冰腹宜供饌。泉躍江心可煮茶。烏繞楔門爭玉樹。鸞開錦誥印金花。閒居欲效潘郎賦。準擬家園製小車。

安山曉泊

兩袖飛仙舞玉龍。曉來朝嶽日華東。門當楊柳灣灣碧。水貼芙蓉岸岸紅。隔艇茶香知楚客。連罾魚熟總吳儂。白頭已忘干戈事。不用乘軒問土風。

發御河

一棹黃流去復回。飛沙積岸雪皑皑。梨花亂逐沙鷗起。燕子深隨野馬來。晚歲宦情初岸幘。暮雲鄉思獨停盃。茶糜滿架留春住。知我將歸爲緩開。

次韻砥平石

金門吏隱愧相如。歲月逡巡翰墨疎。拄笏有時看白雁。濯纓無復戀金魚。倦游築室成真隱。作意還山了舊書。更與老禪深結社。平生黑業總消除。

次韻謝定水

禪板蒲團振祖風。故將妙語起衰翁。青氈舊學慙多缺。玉佩清朝愧罔功。直以簡編窺往聖。敢將翰墨擬宗工。壯年永感辭庭訓。晚歲何由繼五公。

次韻昌國宗聖上人

海上秋潮候月生。島中瑤草不知名。每思大士超禪觀。獨恨秦王苦望瀛。龍吐戒珠殘照影。雁橫梵字故鄉情。妙年碧眼才翻錦。爲念衰翁強入城。

贈徐秀才還里

西風擁騎出前郊。紅葉玲瓏透遠坳。家近不須傳雁帛。縣閒曾是用牛刀。蜚聲展綵春眠柳。文思裁珠夜泣蛟。師友淵源吾豈敢。會看翡翠聳林梢。

送劉明叟治鹽事還省

海上銀沙百鍊成。年年飛騎走縱橫。人傳一馬二童至。春在十洲三島生。烏帽多情簪菊藥。瑤琴有意送潮聲。經綸滿腹須時用。早上囊封致太平。

次韻答西山道逢原

招提遠在岩壑上。曾有耆龐說法來。灑灑玉泉澄戒鉢。團團翠柏護經臺。平疇隔水橫棋局。遠嶂飛空擲酒盃。聞道幽人經論罷。支頤掩息獨徘徊。

送章仲和教授之官池陽

亭亭秋浦玉芙蓉。無限樓臺落照中。定見揮毫題妙句。更須拄笏繼高風。當年故壘遺金鏃。此日清溪漾碧筩。人世機心何日了。持觴爲酌九華公。

梅隱齋

萬藥疎明鐵石堅。肯同餘卉鬪芳妍。青雲覆幕冰承柱。白玉爲堂雪作氈。橘叟不知身外事。壺公唯識洞中天。何人欲問調羹法。一榻蒙頭謝醉眠。

次韻鄭景尹重九四首

年年京國度重陽。禁路風高徹骨涼。坐覺衣寬藏宿土。行疑靴冷怯新霜。紫萸曾憶童時佩。黃菊須看歲晚香。惆悵東山在何許。挑燈無寐坐方牀。無復金猊與覆鞮。屢看秋月缺還圓。風塵自覺真衰矣。勳業深思盍舍旃。烏帽塵荒憐遠客。白衣酒熟慰癯仙。深慙涉世脂韋久。強項何能效董宣。還家兩歲見重陽。過雁橫空拂曉涼。尙憶傾心朝午日。欲將勁節拒朝霜。禽魚有樂隨天性。蜂蝶無知戀晚香。從此林間端見一。不妨枕易睡匡牀。久矣懸車徹坐羈。天機渾沌黜方圓。披沙經窟知非矣。秉燭書林尙勉旃。愧我詞華端近俗。愛君詩律已通仙。門前種菊高如許。亦欲紛披五采宣。

齋前海棠秋日著數花。瓘首賦詩。次韻。

四山紅葉報秋殘。駐目家林認未端。螢點流星驚乍曉。鳳銜初日怯輕寒。鮮鮮敏手攢新錦。炯炯芳心吐故丹。西帝已能回藻景。爲言莫作杏花看。金祇當御衆芳殘。忽見奇葩表樹端。霞臉已拚千日醉。絳唇自怯五更寒。燈籠錦就霞衣帔。箭鏃砂成寶鼎丹。政此淒清端慰藉。停盃擬作百回看。

次韻吳門聲上人

翠樾經院多高人。景德寺有翠樾方丈。碧窗點翰五采新。天機不受梁燕語。逸興直與江鷗親。羨君解衣浣流水。愧

我束帶陪禁宸。屈指當今人物論。從此有約同垂綸。  
至人天隱樂有餘。良玉不願爲雕琢。昂昂盤石大坐相。杳杳歸雁旁行書。白蓮解結碧雲座。綠蕉不羨青  
葱裾。道人緇經悟空假。始信塵世非真如。

憶雙溪

清溪明處水交流。萬井鱗鱗冠蓋稠。杯凝玉光明月入。幕遮翠影落花留。雲生古洞千山雨。風送層樓萬  
壑秋。麗澤祠前最佳絕。藕花零亂勝滄洲。

寄張希孟內翰

君方習隱食翠柏。我亦採真歌白蘋。千嶂遶樓堪岸幘。百泉當戶足垂綸。尊鱸水闊滄洲晚。稻蟹田肥澤  
國春。日夕相思看過雁。客來無惜寄書頻。



